


Dɔla ya Nawēnne sore la sira la nɔ̃ɲlum

Pɔspɔsi gɔ̃ɲɔ ti Apɔli gulɛ bɔ Korēnti dōma



1 Corinthiens avec étude biblique en gurne ninkāre

Prix de vente 200 CFA, wakrɛ 40

Dɔla ya Nawēnne sore la sira la nōɲlum

Pɔspɔsi gōɲɔ ti Apoli gulse bɔ **Korēnti dōma**

1 **Corinthiens** avec étude biblique en **gurne ninkāre**

Pɔspɔsi gōɲɔ ti Apoli gulse
bɔ **Korēnti dōma**

gōn-vōoro 5-38

Gōɲɔ la **zāsɲɔ**

gōn-vōoro 39-81

L'alphabet utilisé dans cette publication est en accord avec l'alphabet agréé par la Commission Nationale des Langues Burkinabè.

Première Edition
Première Impression
Premier trimestre 2002

© Wycliffe Bible Translators

NA0102

Pɔspɔsɪ gɔŋɔ tɪ Apolɪ gulɛ bɔ Korɛntɪ dɔma n pa'altɪ se'em n wāna

Apolɪ daan gulɛ gɔŋɔ wā bɔ la Nawɛnnɛ nɛrba n boe Korɛntɪ tɛŋa.

Apolɪ daan pɔsɛ Nawɛnnɛ tuuma la bilam, la a kɛ bilam na yuunɛ la pusuka (Tuuma gɔŋɔ 18:11).

Korɛntɪ daan de la tɛn-kāte n boe ko-kāte yu'ure n de Mediterane nɔorum, tɪ ɔornɔ ze'elgo zɛ'estɪ bayi bɔna mĩ, tɪ nɛrba sɛnna mĩ leepra. Tɪ tɛŋa la tara bɔntarsɔm zozo'e.

Nɛrba zozo'e n daan boe tɛŋa la puam n tarɪ mi'ilum, la bāŋre, la sisgo buuri to'oto'ore. La ba daan ɪtɪ la yalsɪ, la tuun-be'ero zozo'e, tɪ tuun-bāma mɛ loŋe Nawɛnnɛ nɛrba la.

Wakat-ɛŋa, Apolɪ daan ka le bɔna ba ze'am, dee daan wɔm tɪ welgre la tuun-be'ero n kɛ ba tɛŋasuka. Bela n daan botɪ a fabla ba yelle, gulɛ gɔnnɔ bɔ ba.

A gɔnnɔ na tɪ a gulɛ la, bayi n boe Nawɛnnɛ gɔŋɔ la puam n sɔŋrɪ tɔma, tɪ toogo sān paage tɔ, tɪ mɛ bāŋe tɪ wun ɛŋe se'em.

Apoli daan gulse kā'am ba me yeti:
ba base welgre (sapitri 1-4),
la yalst ɪrgɔ (sapitri 5),
la ba da le tara ba yela sēnna nēr-seba
n ka mi Nawēnne na zē'am maala (6:1-11).
Dee pa'ale ba ti la mase me
ti ba tart ba ĩyā la tunna bɔ'ora Nawēnne (6:12-20).

A daan ken lerge ba la sokristi ti ba soke ē.
La de la pɔg-dire yelle (sapitri 7),
la baga nēnnɔ yelle (sapitri 8-10),
la Azezi kūm tēere dia yelle (sapitri 11),
la Nawēnne Sia bɔ'a yelle (sapitri 12-14),
la kūm vo'ore yelle (sapitri 15).

Gõŋɔ la ba'asgɔ zē'am,
a tɔge la ligri ti ba lagsri sōŋra Nawēnne nērba
yelle, la ēŋa mēŋa sore sēnne yelle,
dee pu'use ba (sapitri 16).

Gõŋ-ēna puam, Apoli pa'ale ti Nawēnne bɔ'a la wuu
puam, nōŋlum n gānni ba wuu (sapitri 13).

Pəspəsi gōŋo ti Apoli gulse bə

Korēnti dōma

1

¹ Mam Apoli ti Nawēnne wi boti mam dena Azezi-Krisi tōntōnna wu ēŋa n boori se'em, la ti sobia Asositent n gulse gōŋo wā ² bə'ora yāma seba n de Nawēnne nērba n boe Korēnti tēŋa la. Nawēnne wi yāma ti ya welge la to'ore dena a nērba Azezi-Krisi iŷā. Gōŋo la ken dena la seba wuu n boe zē'a woo pu'usra Azezi-krisi n de bāma la tōma Zuudāana la iŷā.

³ Ti So Nawēnne, la ti Zuudāana Azezi-Krisi wun ēŋe ya yel-sōnne dee bə ya sū-mā'asum.

⁴ Mam pu'usri Nawēnne wakate wuu ya iŷā, ēn bə ya a yel-sōnne Azezi-Krisi iŷā la.

⁵ Yāma n lagum na Krisi dena ayula la iŷā ti Nawēnne bə ya bə'a wuu n de mi'ilum buuri wuu, la yetoga mi'ilum wuu.

⁶ Krisi kō-yēlga la ti ba tōge bə ya la, yāma gure ē me kāŋkāŋe.

⁷ Bela yāma ka koŋe bə'a baa

ayula, yāma n gu'uri ti ti Zuudāana Azezi-Krisi wa'am wa puke a mēŋa la. ⁸ Ēŋa n wun base ti ya ze'ele kāŋkāŋe ka paage dūnia ba'asgo. Ti ba kān tā'age dōre ya ti ya ēŋe be'em ti Zuudāana Azezi-Krisi wa'aŋo daare. ⁹ Nawēnne n wi ya ti ya lagum na a Dayva Azezi-Krisi n de ti Zuudāana la dena ayula la, de la sira dāana.

Welgre Nawēnne nērba tēŋasuka

¹⁰ M sobiisi, mam sosri ya la ti Zuudāana Azezi-Krisi yu'bre ti ya wuu sakra taaba nōore, ti welgre da bōna ya tēŋasuka. Ēŋe ya nōore ayula, tara put'ere ayula la taaba. ¹¹ M sobiisi, se'ere n soe ti mam yeke bela la, Akolowe yir-dōma baseba n wa'am wa tōge pa'ale mam ti ka-wōm-taaba n boe ya tēŋasuka. ¹² Mam wōm ti yāma nērba baseba yeti, bāma doli la Apoli, ti baseba yeti, bāma doli

la Apolosi, ti baseba yeti, bāma doli la Apyeeri, ti baseba mē yeti, bāma doli la Krisi. ¹³ Yāma tē'ese ti Krisi welse me bu? Bu yāma tē'ese ti Apoli n daan ki dɔ-puurŋa zuo yāma iŷā, bu ba mise yāma ko'om puam la Apoli yu'ure?

¹⁴ Mam pu'usri Nawēnne mam ka mise ya nēra baa ayila ko'om puam sān dagna Akripusi la Agayusi la. ¹⁵ Bela iŷā nēra kān tā'age yele yeti, ba daan mise ēŋa ko'om puam la mam yu'ure. ¹⁶ Ēhē! Mam daan ken mise la Astefanasi la a yir-dōma ko'om puam. La mam ka le mina mam sān ken mise nēr-seka. ¹⁷ Krisi ka tōm mam ti m mise nērba ko'om puam, a tōm mam ti m mōole la Nawēnne kō-yēlga bɔ nērba, la, la dagi la nērsaalba yem, ti la da base ti Krisi n ki kūm dɔ-puurŋa zuo la pāŋa la lebge zāŋa.

Nawēnne yem gānni dūnia yem

¹⁸ Krisi n ki kūm dɔ-puurŋa zuo yetoga la de la yalne bɔ nēr-seba n ka yē fāagre la. La tōma seba n yē fāagre la mi ti la de la

Nawēnne pāŋa. ¹⁹ La gulse Nawēnne gōŋɔ puam ti Nawēnne yeti:

«Mam wun sām yem-dōma yem, dee yese bāŋriba bāŋre.»

²⁰ Yem-dōma yem vōore de la bēm? Gōn-mitba mi'ilum vōore de la bēm? Dūnia wā nōke'endōma n wē'eri nōke'ema ti bāma mi yela zozo'e la vōore de la bēm? Nawēnne pa'ale ti dūnia wā yem de la yalne.

²¹ Nawēnne n ēŋe sela la a yem na, nērsaalba ka tā'age bāŋe ē la ba mēŋa yem. Bela ti Nawēnne boti kō-yēlga la mōolgo ti nērsaalba yeti la de la yalne la, fāage nēr-seba n bɔ ē sra la. ²² Zīfdōma boori ti ba yē la bōn-yālma n pa'ale ti la de la sra, la Grekdōma eeri la yem.

²³ Tōma nōo mōoli la Krisi n ki kūm dɔ-puurŋa zuo la kō-yēlga, kō-yēlga ēŋa ti Zīfdōma dike ti a dena pɔ'ore yetoga, ti seba n dagi Zīfdōma la dike ti la dena yalne. ²⁴ La Nawēnne n looge seba la, seba n de Zīfdōma, la seba n dagi Zīfdōma la, mi ti Krisi de la pāŋa-dāana la yem-dāana n ze'ele Nawēnne zē'am. ²⁵ Bōn-seka ti Nawēnne ēŋe, ti nērsaalba dike ti a dena yalne

na, tart yem me gānna nērsaalba yem. La sela ti Nawēnne ēņe, ti nērsaalba tē'ese ti la ka tart pāņa la, tart pāņa me gānna nērsaalba pāņa.

²⁶ M sōbiisi, leele wā, tē'ese ya bise yāma ti Nawēnne wi la n ān se'em. Nēr-seba n tart dūnia yem, la nēr-seba n tart pāņa, la nēr-zuto ka zo'oge ya puam.

²⁷ La Nawēnne looge sela ti dūnia dōma tē'ese ti la de la yalne, ti a ēņe la yem-dōma yānne, la a ken looge la sela ti dūnia dōma tē'ese ti a ka tart pāņa la, ti a boti pāņa-dōma n yē yānne. ²⁸ La a looge la sela ti dūnia dōma ka bīsrī, la sela ti ba nē'esrī, la sela ti ba tē'ese ti a de la zāņa la, ti a sā'am sela ti dūnia dōma tē'ese ti a de la ninmō'ore bōno. ²⁹ A ēņe bela ti nēra n da yāņe zēke a mēņa Nawēnne nēņam. ³⁰ La

Nawēnne n base ti ya lagum na Azezi-Krisi dena ayūla, ēņa īyā ti ti tara Nawēnne yem, dee mase Nawēnne nēņam, welge to'ore lebge a nērba n yese tōon-be'ero puam. ³¹ Bela ti la gulse Nawēnne gōņo puam yeti: «Seka n boori ti a wē yō'ogo, a wē yō'ogo la sela ti Zuudāana

ēņe la.»

Apoli n mōole Azezi-krisi kō-yēlga se'em

2

¹ M sōbiisi, mam n daan wa'am ya zē'am wa mōole Nawēnne kō-yēlga n suge bō ya la, la dagi la yetog-mi'ilum, bu nērsaalba yem ti mam mōole bō ya. ² Se'ere n soe la, mam daan looge yem ti mam kān mōole sela sela yelle, sān dagna Azezi-Krisi yelle, ēņa n ki do-puurņa zuo la yelle. ³ Mam n daan boe ya zē'am na, mam daan ka tart pāņa, ti dabeem daan tara mam, ti mam gōgra. ⁴ Mam n daan mōole dee zāsum kō-yēlga la, la daan dagi la nērsaalba yem yetoga ti mam daan toge bō ya ti ya sake, mam daan toge me, ti Nawēnne Sia pa'ale a pāņa ⁵ ti yāma n bō Azezi-Krisi sira la, la dagi nērsaalba yem īyā, la de la Nawēnne pāņa īyā.

Nawēnne yem n ān se'em

⁶ La baa bela, tōma togrī la yem yetoga bō'ora seba n bi Nawēnne sore la doosgo puam. La dagi dūnia wā yem, la mē ka

de seba n soe dūnia wā yem. Bāma wun lebge la zāņa. ⁷ Tōma mōolt la Nawēnne yem n daan sugē ti nērba ka mina. Nawēnne daan pōn looge yel-bāma me lan dēņe dūnia pī'iluņo ti a boti ti yē nā'asgō a zē'am. ⁸ Seba n soe dūnia wā baa ayula ka mi yem ēna wā. Ba daan sān mi ni ē, ba kān ka ni Zuudāana n tarti na'am-pāņa wuu la dō-puurņa zuo kv. ⁹ La de wu lan gulse Nawēnne gōņo pvam se'em yeti:

«Bōn-seba ti Nawēnne māasum ti a bō nēr-seba n nōņe ē na, gānni bōn-seba wuu ti nēra nān ka yē, bu wōm, bu tē'ese a putē'erum.»

¹⁰ Nawēnne boti a Sia la puke bōn-bāma pa'ale la tōma. Nawēnne Sia la mi sela woo me, baa la Nawēnne yel-seba n sugē. ¹¹ Āne n mi nērsaala putē'ere? La de la nērsaala mēņa sia mā'a. Bela, nēra mē ka mi Nawēnne putē'ere, sān dagna Nawēnne Sia la mā'a. ¹² La sān dena tōma, tōma ka to'oge dūnia wā sia, tōma to'oge la Nawēnne Sia n ze'ele a zē'am, ti ti yāņe bāņe bōn-seba wuu ti a bō tō.

¹³ La tōma n tōgrī yel-bāna

wā, la dagi nērsaalba yem yetōga, tōma tōgrī la yetōg-seba ti Nawēnne Sia pa'ale tōma, tōma tōgrī la yel-seba n ze'ele Nawēnne Sia zē'am bō'ora nēr-seba n tarti Nawēnne Sia.

¹⁴ La nēr-seka n ka tarti Nawēnne Sia la kān tā'age to'oge sela n ze'ele Nawēnne Sia zē'am, la de la yalne bō ē, a kān tā'age bāņe a vōore. Nēr-seka ti Nawēnne Sia boe la ē le mā'a n mi Nawēnne Sia la yelle.

¹⁵ Nēr-seka ti Nawēnne Sia boe la ē le tā wun bāņe sela woo n ān se'em bōke. La nēra ka tā wun bāņe ēņa dāana yelle bōke. ¹⁶ La de wu lan gulse Nawēnne gōņo pvam se'em yeti:

«Āne n mi Zuudāana putē'ere? Āne n wun yāņe kā'an ē?»

La sān dena tōma, tōma tarti la Krisi putē'ere.

Seba n mōolt kō-yēlga la tōoma

3

¹ M sobiisi, mam daan ka tā'age tōge ya wu nērba n tarti Nawēnne Sia. Mam daan tōge ya wu nērba n voa wu ba mēņa n boort se'em, wu ya de la

1 Korēnti 3

bileesti Kriisi doosgo la puam.
² Yāma n daan ka tā wun to'oge zāsq-ke'eño n ān wu di-ke'ene la iŷā, mam daan tōge ya wu bileesti n mōgrt bī'isum dee ka paage di-ke'ene dia. La baa leele wā, ya ken ka paage ya to'oge zāsq-ke'eño, ³ yāma n ken vōa wu ya mēŷa n boort se'em na iŷā. Ya sān ita sūure zebra la taaba, bela ka pa'ale ti ya vōa wu ya mēŷa n boort se'em, dee ita wu dūnia nērba n tti se'em na sira? ⁴ Ya nēra ayta sān yeti: «Mam doli la Apoli», ti ayta yeti: «Mam doli la Apolosi», ya ka itti wu dūnia nērba la?

⁵ Apolosi de la āne? Apoli de la āne? Tōma wen dena la Nawēnne tuntōntba n daan boti ya bō Azezi-kriisi sira. Tōma nēra woo tunni la tvn-seka ti Zuudāana la bō tō ti ti tum.
⁶ Tōma ān wu kaarba la, mam sele me, ti Apolosi base ko'om. La Nawēnne n boti ba bita.
⁷ Seka n selli, la seka n basri ko'om na de la zāŷa. Nawēnne mā'a n boti ba bita. ⁸ Seka n selli, la seka n basri ko'om na de la ayta. Nawēnne wun yō nēra woo wu ēn tum se'em na.
⁹ Tōma lagum taaba tunna la

Nawēnne tōoma. La yāma ān wu Nawēnne va'am, la ya ān wu Nawēnne deego.

¹⁰ Nawēnne n ēŷe mam yel-sōnne na iŷā, mam tum wu tōnmēta n mi mēa sōŷa n ēbe ēbre, ti nēra ayēma mē dōgle a zuo. La nēra woo guuse a mēŷa la ēn mēti se'em na. ¹¹ Nawēnne dūke la Azezi-kriisi ti a dena ēbre la. Ēbre ayēma ka le bōna ti nēra wun ēbe. ¹² Nēr-seba n mēti dōgla ēbre la zuo la, baseba dikri la sālma, bu zūuro, bu kuga ligri n zo'oge mēta dōgla ēbre la zuo. Ti baseba dikra dōro, bu mōoro, bu kēnkā mēta dōgla. ¹³ La Azezi-Kriisi wa'aŷo daare, nēra woo n tum se'em wun puke me peelem puam. La de la bugum n wun make tōoma la, pa'ale nēra woo tōoma n ān se'em. ¹⁴ Bugum na sān ka di nēra tōoma, a dāana wun to'oge yōro. ¹⁵ La bugum na sān di nēra tōoma, a dāana wun koŷe yōro. La nēra la mēŷa wun yē fāagre, la a wun āna wu a doose la bugum puam pōse.

¹⁶ Ya ka mi ti ya de la Nawēnne deego ti a Sia bōna ya puam? ¹⁷ Nēra sān sāl'm

Nawēnne deego la, Nawēnne wun sã'am a dāana. Nawēnne deego de la a mēŋa mā'a bōnɔ, la yāma n de a deego la.

¹⁸ Nēra da pã'ase a mēŋa. Nēra sãn bɔna ya puam tē'ese ti ēŋa tarti dūnia wã yem, la mase me ti a lebge gɔŋɔ dūnia wã puam, bela n wun base ti a lebge yem-dāana. ¹⁹ Sela ti dūnia dōma tē'ese ti la de la yem na, de la yalne Nawēnne zē'am. La de wu lan gulse Nawēnne gōŋɔ puam se'em yeti: «Nawēnne bēti yem-dōma me yōgra ba ba yem-kēgstiga la puam.» ²⁰ La ken gulse yeti: «Zuudāana mi yem dōma tē'esgɔ me, a mi ti ba de la zāŋa.» ²¹ Bela iyã nēr-seka da wē yō'ogɔ nērsaala iyã. Sela woo de la yāma bōnɔ. ²² Mam Apoli, bu Apolɔsti, bu Apiyēerti, bu dūnia wã, bu yōvore, bu kūm, bu sela n boe leelee wã, bu sela n wun wa wa'am, yāma n soe ba wuu. ²³ La yāma, Krisi n soe ya, ti Nawēnne sɔna Krisi.

Azezi-Krisi tōntōntba

4

¹ Bela, dēnt ti ya bāŋe ti tōma de la Krisi tuntōntba, ti

Nawēnne dıke a yela n daan sugɛ ēŋe tōma nu'usum ti ti tɔge bɔ nērba. ² Ba sãn dıke tvune ēŋe nēra nu'usum ti a bısra, ba boort ti a dena la sura dāana. ³ La sãn dena mam, yāma bu dūnia wã sarıyadıtba sãn tɔgra mam yelle se'em, la ka tti mam se'ere. Mam mē ka diti m mēŋa sarıya. ⁴ Mam mi m sūure puam ti mam ka ēŋe sela n ka añ sōŋa, la, la dagu bela n pa'ale ti mam mase ya. La de la Zuudāana n diti mam sarıya. ⁵ Bela iyã, da dēŋe ya di nēra sarıya dee ti Zuudāana la nãn ka wa'am.

A sãn wa wa'am, a wun dıke sela n sugɛ lika puam yese peelem puam, dee botti bōn-seba wuu ti nērsaalba tē'esri ba sūure puam puke. Wakat-ēŋa, Nawēnne wun pēge nēra woo wu lan mase ti a pēge ē se'em.

⁶ M sɔbiisi, mam n dıke m mēŋa la Apolɔsti make bela wuu la, la de la yāma iyã, ti tōma n ēŋe se'em na wun dena zāsŋɔ bɔ ya. Ti ya «da ēŋe yōse lan gulse Nawēnne gōŋɔ puam se'em na.» Bela, ya nēra nēra da zēke a mēŋa wē'era yō'ogɔ la nēra ayıla dee pɔ'ɔra ayēma. ⁷ Bēm soe ti fōn tē'ese ti fōn gānntı fu

1 Korēnti 4

taaba? Bēm ti fōn tarti ti la dagna Nawēnne n bō fō? La fu sān to'oge, wāne ti fu pa'ala fu mēja wu fu ka to'oge me na?

⁸ Ya tē'ese ti yāma pōn tara Nawēnne bōntarsōm na wuu ti la seke mē. La yāma lebge la na'adōma dee ti tōma ka pa'ase. Mam boort ni ti ya srti dena la na'adōma, ti tōma mē po di na'am na. ⁹ Mam tē'ese ti Nawēnne looge tōma seba n de a tōntōntba la, ti ti bōna la nērba la wuu poorum, āna wu nērba ti ba di ba sariya yeti ba ku ba, ti dūnia dōma wuu bīsra dee la'ara, nērbaalba, la malekadōma wuu. ¹⁰ Tōma ān wu zollō Kriisi iŷyā, la yāma tē'ese ti yāma de la yem dōma Kriisi doosgo puam. Ya tē'ese ti tōma ka tarti pāja, la yāma tarti pāja. Nērba pō'ort tōma me, la ba nā'asri yāma mē. ¹¹ Kōm la koyūuro tarti tōma mē, ti tōma ka tara fu-sōma, ti ba nāmsra tōma, ti tōma eera ye'ena halt wa paam wakat-ēna. ¹² La tōma tunni la ti yō'ogō pāja nāmsra yēta ti nōore dia. Ba sān tu tōma, tōma pu'usri la Nawēnne bō'ora ba. Ba sān nāmsra tōma, tōma wībri mē. ¹³ Ba sān tōge

tōma yetog-be'ero, tōma lebsri la yetog-sōma. Dūnia dōma bīsri tōma, ti tōma āna wu sōgro la, ka tara vōore ba zē'am, halt wa paam zīna.

¹⁴ Mam ka gulse wāna bō ya ti m boti yānne yōke ya, mam yeti m kā'an ya me wu m kōma ti m nōje la. ¹⁵ Baa ya sān tara nērba tuspia ti ba bīsra ya Kriisi doosgo la puam, ya tarti la sō ayila mā'a. Mam n de ya sō Azezi-kriisi doosgo la puam, mam n wa'am wa mōole kō-yēlga la bō ya ti ya yē vom na iŷyā. ¹⁶ Bela, mam belni ya me ti ya ita mam n ita se'em na. ¹⁷ Bela ti mam tōm Atimōti ya zē'am. A de la mam bi-nōjre n de sira dāana Zuudāana doosgo la puam. Ēja n wun tēge ya mam n voa se'em Kriisi doosgo la puam, la de la bōn-bāma ti mam zāsni Azezi nērba n lagsri zē'a woo la.

¹⁸ Ya nērba baseba tē'esri ti mam kān leme wa'am ya zē'am, zēkra ba mēnsi. ¹⁹ La Zuudāana la sān bōora, la kān yuuge dee ti mam wa'am ya zē'am, la mam wun bāje sela ti zēk-mēja-dōma la wun tā'age ēje, ti la sān dagna ba yetoga la mā'a.

²⁰ Se'ere n soe la, Nawēnne so'olum dagi nōore yetoga, la de la pānja. ²¹ Yāma boori la bēm? Yāma boori ti m wa'am na kafōbga bu? Bu m wa'am na nōŋlum la sū-bugsum?

Krisi nēra ka mase ti a ita yalsi

5

¹ Ba togri ti ya ita la yalsi, halt yalsi seka buuri ti baa seba n ka doli Nawēnne ka sake ita. Mam wōm ti ba yeti nēra ayila n boe ya puam gā la a so pōga. ² Dee ti yāma zēkra ya mēŋa. La de nu na yāma sūure sā'am, ti ya yese bura-seka n ēŋe yel-be'e-ēŋa la ya tēŋasuka.

³ Baa mam n ka boe yāma zē'am, mam putē'ere boe la ya le me. La mam pōn di bura-seka n ēŋe yel-be'e-ēŋa la sariya me wu mam boe la yāma le, ⁴ yele la Zuudāana Azezi yu'ure yeti: Yāma n lagse la taaba, ti mam putē'ere bona la yāma, ti Zuudāana Azezi pānja bona la ya le la, ⁵ ya yese nēr-ēŋa ya tēŋasuka base Asūtāana nu'usum ti a sā'am a iyā, dee ti a sia wun yē fāagre ti Zuudāana Azezi

wa'aŋo daare^a.

⁶ Yāma n zēkri ya mēnsi la, la ka ān sōŋa. Yāma ka mi ti dābille fēe n boti borborti zom wuu ukra? ⁷ Yese ya tuun-be'e-ēŋa n ān wu dābille la ya tēŋasuka, bela ti ya wun āna sōŋa wu zom paalga ti ba ka ēŋe dābille ba puam. Ya pōn āna sōŋa wu borborti n ka tarti dābille la. Se'ere n soe la, Krisi daan sake me ti ba ku ē tōma iyā wu Zoog-base kibsa pebila la. ⁸ Bela, base ya ti ti yese putē'e-be'ero, la tōon-be'ero wuu ti vom puam, dee dena pupeelem, la sira-dōma wu ba diti Zoog-base kibsa la borborti n ka tarti dābille la.

⁹ Mam n daan gulse gōn-seka la, mam daan yele ya ti ya da lagum la seba n ita yalsi. ¹⁰ Mam ka togri nēr-seba wuu n boe dūnia puam ita yalsi, bu nōŋe bōno, bu dena nayigba, bu bag-kāabrība n ka doli Nawēnne na yelle. Ya sān yeti ya welge ya mēŋa la bāma, dēnti ti ya yese dūnia wā puam. ¹¹ Mam daan

^a **5:5** Nēra sān tōnna tōon-be'ero ti ba yese ē wēndeego la puam, a wun teege yem base tōon-be'ero me, ti a sia yē fāagre.

gulse bo ya yeti, ya da dola la nēr-seka n yeti a mēṅa ti ēṅa doli la Nawēnne dee ita yalɩ, bu nōṅe bōnɔ, bu kāabra бага, bu tvura nērba, bu yūura dāam bugra, bu zūura. Da pōn lagum ya la nēr-ēṅa dāana di.

¹²⁻¹³ La dagt mam n wun di seba n ka doli Nawēnne na sariya, Nawēnne n wun di ba sariya. La de la yāma seba n boe la taaba la n wun di taaba sariya, wu lan gulse Nawēnne gōṅo puam yeti: «Dige ya tōon-be'ero dāana la ya puam.»

Sariya dia yelle

6

¹ Ya nēra ayɩla sān tara yelle la ayēma, bēm ti a tarti ē we'esa seba n ka doli Nawēnne zē'am ti ba ka maale yelle la, dee ka tarti ē we'esa Nawēnne nērba zē'am? ² Yāma ka mi ti Nawēnne nērba n wun wa di dūnia dōma sariya? La yāma sān wun wa di dūnia dōma sariya, ya ka tā wun di yel-pɩg-bāna wā sariya? ³ Yāma ka mi ti tōma n wun wa di malekadōma sariya? La n de bela la, bēm ti yāma ka tāna wun di dūnia wā yela sariya?

⁴ La yāma sān tara yel-bāna buuri la taaba, yāma tarti sēnna la seba n ka mi Nawēnne sore yela la zē'am. ⁵ Mam yeti ya ti la de la yānne bo ya. Bela, nēra baa ayɩla ka boe yāma puam n tarti yem, wun tā'age maale yel-seba ti yāma tarti la taaba la?

⁶ La ka mase ti yāma n de sobiisi sān tara yelle la taaba, ya tara taaba sēnna sariyaditba n ka doli Nawēnne zē'am.

⁷ Yāma n tarti taaba sēnna sariyadia zē'am na, la pōn pa'ale ti ya tuuge me zozo'e. Nēra sān ēṅe ya be'em, bu zū ya, bēm ti yāma ka ita sugri, dee tara taaba sēnna sariyadia zē'am? ⁸ Yāma malun ita taaba la be'em zūura taaba, yāma n de sobiisi Nawēnne doosgo puam na.

⁹ Yāma ka mi ti tōon-be'ero dōma kān yē zē'a Nawēnne so'olum puam? Da pā'ase ya mēṅa. Nēr-seba n ita yalɩ, bu seba n kāabru бага, bu seba n gā la taaba pɔgba la taaba sirba, bu bura-seba n gā la taaba, ¹⁰ bu nayigba, bu seba n nōṅe bōnɔ, bu seba n yūuri dāam bugra, bu seba n tvuri nērba, bu fāarba, bāma kān kē Nawēnne so'olum puam. ¹¹ Yāma nērba baseba

daan ān na bela. La Nawēnne Sia peege yāma tōon-be'ero me boti ya lebge Nawēnne nērba, mase a zē'am Zuudāana Azezi-krisi yo'bre ĩyā.

Dike ya ĩyā la nā'ase

Nawēnne

¹² Yāma nērba baseba yetu: «Mam tarti sore wun ēje sela woo me.» La mam yetu ya ti dagi sela woo n tarti yōoro. Mam mē tarti sore wun ēje sela woo me. La mam kān sake lebge sela baa ayila yamja. ¹³ Yāma yetu, dia boe la puure ĩyā, ti puure mē bona dia ĩyā. La de la sira, la Nawēnne wun sā'am bāma bayi la wuu me. La nērsaala ĩyā ka boe yalsti ĩyā, a boe la Zuudāana ĩyā. Ti Zuudāana mē sōna ĩyā la. ¹⁴ Nawēnne n vo'oge ti Zuudāana Azezi la, ēja n wun ken vo'oge tōma la a pāja. ¹⁵ Yāma ka mi ti ya ĩyā la de la Azezi-krisi ĩyā la zē'a ayila? Bela, la ān sōja ti nēra dike Krisi ĩyā zē'a ayila la sēje ka lagum la pōg-yalsidōma me bu? Ayet, la pōn ka mase. ¹⁶ Ya ka mi ti seka n lagum a mēja la pōg-seka n titi yalsti, ēja la pōka

la lebge la ĩyā ayila? La gulse Nawēnne gōjo puam yeti buraaga la pōka sān lagum taaba, bāma bayi lebge la ayila. ¹⁷ La seka n lagum a mēja la Zuudāana la, Nawēnne Sia boti a lebge la ayila la Zuudāana. ¹⁸ Zoe ya yalsti. Tuun-be'e-seba wuu ti nērsaala titi la ka boe a ĩyā puam. La tuun-be'er-seka n de yalsti la boe la nērsaala ĩyā puam. ¹⁹ Ya ka mi ti ya ĩyā la de la Nawēnne Sia deego? Nawēnne Sia la ti a bo ya la boe ya puam me, ya ka soe ya mēja. ²⁰ Nawēnne da ya la da'aga n de toogo, bela, dike ya ya ĩyā, nā'asra Nawēnne.»

Pōg-dire yelle

7

¹ Mam yetu m lerge la yāma n daan gulse soke mam se'em na: «La ān sōja ti buraaga da di pōga.» ² La, lan wun ēje se'em ti ya da ēje yalsti, buraaga woo di a pōga, ti pōka woo mē ele a sira. ³ La buraaga bo a pōga lan mase ti a bo ē sela la, ti pōka mē bo a sira lan mase ti a bo ē sela la. ⁴ Se'ere n soe la, pōka ka soe a mēja ĩyā. La de la a sira n

soe ē. La buraaga mē ka soe a mēŋa iŷā. La de la a pōga n soe ē. ⁵ Pōka la a sira da zagse ti bāma kān gā la taaba, sān dagna ti ya ēŋe la nōore ayila looge wakate fēe ti ya pu'use Nawēnne, bela poorum ya le lagum na taaba ti Asūtāana da make ya, ya sān ka tā'age yōke ya mēŋa. ⁶ Mam n yele ya se'em wā, la dagi pēgre, la de la sore ti mam pa'ale ya. ⁷ La sān dena mam tē'esgo, nēra woo sān dena dakōore wu mam n ān se'em wā, la ān sōŋa. La nērsaala woo tarti la a bō'a ti Nawēnne bō ē. Ayila tarti la bō'a ayēma, ti ayēma mē tara bō'a ayēma.

⁸ Mam yeti seba n ka tara pōgba bu n ka tara sirba, la pōkōpa yeti, ba sān ken bōna bāma bayila mā'a wu mam n ān se'em na, la ān sōŋa. ⁹ La ba sān ka tāna wun yōke ba mēŋa, ba di pōgba, bu ba ele sirba. La ān sōŋa ti ya di pōgba, bu ya ele sirba, sōna yāma n zī ti a yemleego tara ya nāmsra. ¹⁰ La sān dena seba n tarti pōgba bu n tarti sirba la, mam yeti ya la wāna: La, la dagi mam mēŋa nōore, la de la Zuudāana Azezi nōore: Pōka da base a sira. ¹¹ La

a sān base a sira, a zē, a da le bōta buraasti, bu ēŋa la a sira la maale ba yelle la le naage taaba. Buraaga mē da lebse a pōga.

¹² La sān dena nērba baseba la, mam yeti la wāna: La de la mam mēŋa n yele, la dagi Zuudāana nōore: Buraaga n doli Azezi sore sān tara pōga n ka doli Azezi sore, dee sake ti a bōna la ē, a da lebse ē. ¹³ La pōka n doli Azezi sore sān tara sira n ka doli Azezi sore, dee sake ti a bōna la ē, a da base ē.

¹⁴ Sira n ka doli Azezi sore ān sōŋa me, a pōga n de Nawēnne nēra la iŷā. La pōka n ka doli Azezi sore ān sōŋa me, a sira n de Nawēnne nēra la iŷā. Bela ba kōma wun āna sōŋa me, sān dagna bela, ba kōma wun āna wu nēr-seba n ka doli Nawēnne kōma. ¹⁵ La seka n ka doli Azezi sore la, sān bōra ti a base seka n doli Azezi sore la, a base ē ti a fōrge. La sān dena bela, la ka de pēgre ti pōka bu buraaga n doli Azezi sore bōna la seka n ka doli Azezi sore. Nawēnne wi to ti ti vōa la sū-mā'asum la taaba. ¹⁶ Pōka, fōn ēŋe la wāne bāŋe fōn sān wun tā'age boti fu sira la yē fāagre? Bu buraaga,

fōn ēnje la wāne bānje fōn sān wun tā'age boti fu pōga la yē fāagre?

Sela n tart yōoro de la Nawēnne sakre

¹⁷ Sela n ān sōja de la nēra woo vōa wu ēn daan ān se'em ti Nawēnne wi ē na, wu Zuudāana n bō ē ti a vōa se'em na. La de la bela ti mam pa'alt Nawēnne nērba n boe zē'est wuu, ti ba ita.

¹⁸ Nēr-seka sān wā, dee ti Nawēnne wi ē, a da eera ti a sugē wāaga la. Nēr-seka n mē ka wā, dee ti Nawēnne wi ē, a da wā. ¹⁹ Seka n wā, bu seka n ka wā, ba wuu ka tart yōoro. Sela n tart yōoro de la Nawēnne nōore sakre. ²⁰ Nēra woo ken āna wu ēn daan ān se'em ti Nawēnne wi ē na. ²¹ Fu daan sān dena la yamja ti Nawēnne wi fo, da base ti fu yem yōora. La sore sān wa bona ti fu wun to'oge fu mēja, fu doose bilam to'oge fu mēja. ²² La nēr-seka n de yamja ti Zuudāana la wi ē, a de la nēra ti Zuudāana yolse. Bela mē, nēr-seka n dagi yamja ti Zuudāana Krisi wi ē, a de la Krisi yamja. ²³ Nawēnne da ya la toogo, bela da lebge ya nērba

yamst. ²⁴ Bela iyā, m sobiisi, nēra woo vōa Nawēnne nējam wu ēn daan ān se'em ti Nawēnne wi ē na.

Apoli le tōge pōg-dire yelle

²⁵ Mam yeti m tōge la seba n ka tart surba, bu pōgba la yelle, mam ka to'oge nōore Zuudāana Azezi zē'am. La de la mam mēja putē'ere, la ya wun bō mam sira Zuudāana la n zoe mam ninbāalga la iyā. ²⁶ Yel-seba n boe leele wā iyā, mam tē'ese ti la ān sōja ti nēra woo ken āna wu ēn ān se'em na.

²⁷ Fu sān tara pōga, da eera ti fu lebse ē. La fu sān ka tara pōga, da eera ti fu di pōga. ²⁸ La fu sān di pōga, la dagi be'em. La pug-seka n mē ele sira, la dagi be'em. Nēr-seba n tart pōgba, bu surba la wun yē la sū-sā'ajo dūnia wā puam, bela ti mam ka bōora ti yel-bāma paage ya.

²⁹ M sobiisi, mam n yeti ya se'em n wāna: Wakat-seka ti Nawēnne bō to la ka le zo'oge. Lan pōse leele wā, la ān sōja ti seba n tart pōgba la, āna wu ba ka tart pōgba, ³⁰ ti seba n kelli āna wu ba ka kelli, ti seba n iti sū-yēlga, āna wu ba ka iti sū-

1 Korēnti 7

yēlga, tu seba n da'ari, āna wu ba ka tarti sela ti ba da'ari la.

³¹ Ti seba n yēti dūnia bōntarsōm, āna wu ba ka yēti bōntarsōm. Se'ere n soe la, dūnia wā n ān se'em wā tolli me.

³² Mam ka boorti ti ya yem yōra la sela sela. Seka n ka tarti pōga dikri a putē'ere wuu tunna la Zuudāana la tōoma, a eeri la ēṅa n wun ēṅe se'em ti la āna Zuudāana la sūure yēlum. ³³ La seka n di pōga, dūnia yela n pake ē, a eeri la ēṅa n wun ēṅe se'em ti la āna a pōga sūure yēlum. ³⁴ Bela a putē'ere n boorti se'em na puti me. La pōka bu pugla n mē ka tarti sira dikri a putē'ere wuu tunna la Zuudāana la tōoma, a eeri la ēṅa n wun ēṅe se'em, ti a iṅyā la a sta wun wa dena Nawēnne bōno. La seka n tarti sira, dūnia yela n pake ē, a eeri la ēṅa n wun ēṅe se'em, ti la āna a sira sūure yēlum. ³⁵ La de la yāma sōṅre iṅyā ti mam yele bela. Mam ka boorti ti m mōrge ya dike yelle dōgle ya zuto. Mam boorti ti ya tum na sela n ān sōṅa, la ya dike ya mēṅa wuu bo Zuudāana la, tunna a tōoma.

³⁶ La sān dena seba n legri pugunto ti ba di la, seka sān tē'ese ti ēṅa sān base a zeba la ka di ē, ēṅa ēṅe ē na be'em, dee ti a yemleego tara ē, a di ē wu ēn tē'ese se'em na, ti la dagi be'em. ³⁷ La nēr-seka sān tē'ese a putē'erum sōṅa sōṅa ti ēṅa kān di ē, ti pērgre ka bōna mī, a sān wun tā'age yōke a mēṅa, a ēṅe wu ēn tē'ese se'em na, ti la ān sōṅa. ³⁸ Bela, nēr-seka n di pōga, a ēṅe sōṅa. La nēr-seka n mē ka di pōga, a ēṅe sōṅa gānna.

³⁹ Pōg-seka n ele, dēnti ti a bōna la a sira le, ēn ken vōa wakate la. La a sira la sān ki, sore boe me ti a le ele nēr-seka ti a boorti, la dēnti ti a dena nēra n doli Zuudāana Azezi sore. ⁴⁰ La mam tē'ese ti a sān ka le ele sira, a sūure wun āna yēlum gānna ēn ele. Mam tē'ese ti mam tarti la Nawēnne Sta pa'ala ya.

Baga nēnno yelle**8**

¹ La sãn dena bõn-seba ti ba dıke kãabe bo бага la nēnno yelle, ti mi ti ti wuu tarti bãjre me, wu yãma n yeke se'em na. La bãjre boti nēra zēkra la a mēja. La nõjlum sõjri nēba me. ² Nēr-seka sãn tē'ese ti ēja mi sela, a ken ka mina wu lan mase ti a mina se'em. ³ La nēra sãn nõje Nawēnne, Nawēnne mi ē me.

⁴ Bela, la sãn dena бага nēnno na yelle, ti mi ti бага de la sela n de zãja dũnia wã zuo, dee ken mina ti Nawēnne ayıla mã'a n boe. ⁵ Bõndõma n boe saazuum bu tēja zuo, ti nērsaalba wi'iri ti wēna. Asıra, bõndõma zozo'e n boe ti nērsaalba wi'iri ti wēna, bu zuudãandõma. ⁶ La tõma mi ti Nawēnne ayıla n boe dena ti So n nãam sela woo, la ēja iyã ti ti vça. La tõma ken mina ti Zuudãana ayıla mã'a n boe, a de la Azezi-krisi, la doose la ēja ti sela woo bona, la ken doose la ēja ti ti tara vom.

⁷ La, la dagı nēra woo n mi wãna. Nēba baseba malum

bage me, ti halt la zĩna ba sãn obe бага nēnno, ba ken tē'esra a yelle me ti la sırtı de la бага dia. La ban ka mi Nawēnne sore yela sõja la, ba tē'esrı ba sũure puam ti ba ēje la be'em. ⁸ La dagı dia n wun botı ti lem Nawēnne. Ti sãn ka di, sela ka pç'ortı tç, la ti sãn di, a ka pa'asrı ti sela.

⁹ La guuse ya mēja, ti yan tartı nõore dita sela woo la, da base ti nēr-seba n ka tartı pãja Nawēnne sore doosgo puam na tum tõon-be'ero. ¹⁰ Nēr-seka n ka mi Nawēnne sore yela sõja la, sãn yē fõn tartı bãjre la n zĩ бага kãabgo zē'am çbra nēnno, la wun pã'ase ē ti a mē obe la бага nēnno. ¹¹ Bela, fõn bãjre la wun base ti nēr-ēja n ka tartı pãja Nawēnne sore doosgo puam na sã'am me, a de la fıv sobia ti Krisi ki a iyã. ¹² Fıv sãn tum tvun-be'e-ēna sã'am fıv sobia n ka mi Nawēnne sore yela sõja putē'ere, fıv ēje la Krisi be'em. ¹³ Bela, la sãn dena dia n wun base ti mam sobia tum tõon-be'ero, mam kãn le malun di ē, ti m da base ti m sobia tum tõon-be'ero.

Apoli base ɛn tarti sore wun ɛŋe sela la me

9

¹ Mam ka soe m mēŋa tāna wun ɛŋe mam n boorti se'em me bu? Mam dagi la Krisi tōntōnna bu? Mam daan ka yē ti Zuudāana Azezi me bu? La dagi tɔvun-seba ti mam tɔvni bɔ'ora Zuudāana la n base ti yāma bɔ ɛ sira? ² Baa nērba baseba sān ka sake ti mam de Krisi tōntōnna, yāma mase me ti ya sake. Yāma n doli Krisi sore la, n de sela n pa'ale ti mam de Krisi tōntōnna. ³ Seba n zergri mam na, mam tɔgri la wāna lergra ba. ⁴ Tōma ka tarti sore ti ba bɔ ti dia la ko'om ti tōoma la iyā? ⁵ Tōma ka tarti sore wun di pɔgba n doli Nawēnne sore ti ba dɔla ti eera wu ti tōntōn-taaba, la Zuudāana yɔbsi, la Apɔyeeri n uti se'em na bu? ⁶ Yāma tē'ese ti mam na Abarnabasi mā'a n de ti tɔvna ti mēŋa dita bu? ⁷ Āne n de sudaaga dee bɔsra a mēŋa dia yelle? Āne n sele tusti dee ka dita ba bea? La āne n gu'uri dūnsi dee ka dita ba ulum?

⁸ Mam ka yele bela la nērbaala putē'ere ma'ā. Nawēnne tā'are la

mē yele la bela. ⁹ La gulse tā'are gōn-seba ti Nawēnne daan bɔ Amoyisi la puam yeti: «Da ɛŋe ya naafɔ n kɔɔri nōore yuka.» La de la niigi yelle ma'ā ti Nawēnne daan tɔge bu? ¹⁰ Ayei, la de la tōma yelle ti la gulse bela. Bela nēr-seka n kɔɔri tarti putē'ere ti a wun yē me, ti seka n wē'eri bōn-kɔɔla mē tarti putē'ere ti a wun yē, dēni ti ba wuu yē ba pure. ¹¹ Tōma n mōole Nawēnne yetɔga la bɔ ya la, la ān wu bōnbuuri ti tōma bure. Bela, la mase me ti ya looge ya bōntarsōm na sōŋe tōma wu bōn-kɔɔla pure ti ya bɔ tōma. ¹² Nērba baseba sān tara nōore ti ba to'oge yāma bōntarsōm, tōma n tarti nōore ti ti to'oge yāma bōntarsōm gānna. La tōma ka to'oge ya sela wu tōma n tarti nōore se'em na, tōma sake nāmsgɔ me sela woo puam, tōma ka boorti ti ti gu Krisi kō-yēlga la mōolɔ.

¹³ Yāma ka mi ti seba n tɔvni Wēnde-kāte la puam, diti la bilam? La ti seba n kāabri bɔ'ora Nawēnne na, to'orti ba pure la kāabgɔ zē'a na? ¹⁴ Bela, Zuudāana la bɔ nōore me ti seba n mōola kō-yēlga la, mē tɔ'ora

ba dia bilam.

¹⁵ La mam ka to'oge ya sela baa ayila wu mam n tarti nōore se'em na. La mam ka gulse bela mē yeti ya bɔ mam sela. Baa mam sãn wun ki sōna. Ti nēra da wa base ti mam ka tara yēsōm. ¹⁶ Mam n mōoli Nawēnne kō-yēlga la, mam ka tã wun wē m yō'ogɔ a ãyã. La de la pērgre ti mam mōole. Mam sãn ka mōole kō-yēlga la, mam wun yē la toogo. ¹⁷ La sãn de ni la mam mēŋa n looge yem mōola kō-yēlga la, mam wun to'oge ni la yɔɔɔ. La, lan de pērgre ti mam mōole la, la de la tuɔne ti Nawēnne dɩke dɔgle mam zuo. ¹⁸ Bela, bēm n de mam yɔɔɔ? La de la mam n mōoli kō-yēlga la bɔ'ora nērba zãŋa, dee ka tɔ'ora ba sela wu mam tarti nōore se'em na.

¹⁹ Mam soe m mēŋa mē, mam dagi nēra yamŋa. La baa bela, mam dɩke m mēŋa lebge la nērba wuu yamŋa, ti m tã'age boti ba nērba zozo'e dɔla Krisi. ²⁰ Mam sãn bɔna Zifdōma zē'am, mam vɔa wu Zifdōma la, ti m tã'age boti ba doose Azezi. Amoyisi tã'are la ka le tara nōore la mam, la mam sãn bɔna

la nēr-bãma n doli tã'are la, mam sakri tã'are wu bãma la, ti m boti seba n doli tã'are la doose Azezi. ²¹ La mam sãn bɔna nēr-seba n ka doli tã'are la zē'am, mam vɔa wu nēr-seba n ka doli tã'are la, ti m boti ba doose Azezi. La bela ka pa'ale ti mam ka doli Nawēnne tã'are la. Mam doli la Krisi tã'are. ²² Mam sãn bɔna la nēr-seba n ka tarti pãŋa Nawēnne sore doosgo puam, mam vɔa wu bãma, ti m sōŋe ba ti ba da base Nawēnne sore. Mam iti sela woo la bela bɔ'ora nērba buuri wuu, ita mam wun ēŋe se'em ti m tã'age fãage ba nērba baseba. ²³ Nawēnne kō-yēlga la ãyã ti mam ita bela wuu ti m wa po to'oge a pure.

²⁴ Yãma mi ti zɔa puam, zɔtba la wuu lagum zɔta mē, la ba nēra ayila mã'a n wun zoe yãŋe to'oge bɔ'a. Bela, mōrge ya wu zɔtba n zoti se'em na, ti ya yãŋe to'oge bɔ'a Nawēnne zē'am. ²⁵ Zɔtba wuu yōkri ba mēŋa me sela woo puam ti ba to'oge bɔ'a n kãn yuuge dee sã'am. La tōma yōkri ti mēŋa ti ti wa to'oge la bɔ'a n kãn malun sã'am. ²⁶ Bela n soe ti mam ka zɔta yoo yoo,

la mam ka zebri yoo yoo wu nēra n wē'eri kusebgo. ²⁷ Mam mōrgri m īyā me tara m mēja sōṅa sōṅa. Se'ere n soe la, mam ka boori ti mam n mōoli kō-yēlga la bō'ora nērba la, mam mēja wa koṅe yooṅo Nawēnne zē'am.

Israyeli dōma māmsgo

10

¹ M sobiisi, mam boori ti ya tē'ese la ti yaabdōma n yuun doli Amoyisi la yelle. Ba wuu yuun boe la sawate la tēṅa, la ba wuu yuun doose la ko-kāte la puam tole. ² La ān wu Nawēnne yuun mise ba me sawate la puam, la ko-kāte la puam ti ba dena ayila la Amoyisi. ³ Ba wuu yuun di la dia ayila, dee yū ko'om ayila n ze'ele Nawēnne zē'am. ⁴ Ba yuun yū la ko'om n yesri tānpīa ti Nawēnne bō ba puam. Tānpī-ēṅa yuun de la Krisi n doli ba. ⁵ La baa bela, ba nērba zozo'e yuun ka iti sela n mase Nawēnne yem, ti a base ti ba ki weego la puam. ⁶ Bōn-bāna wuu ēṅe ti la pa'ale la tōma, ti ti da bōora ti ēṅe be'em

wu bāma la. ⁷ Da dola ya бага wu bāma baseba n yuun ēṅe se'em na. La gulse Nawēnne gōṅo puam yeti: «Nērba la zī'ire me di dee yū, dee isge de'ena^b.»

⁸ Ti da ita yalst wu bāma baseba n yuun ēṅe se'em, ti ba nērba tuspisiyi la atā ki daare ayila la.

⁹ Ti da make ya ti Zuudāana la bise wu bāma baseba n yuun ēṅe se'em, ti bōnse'edōma ku ba la. ¹⁰ Ti da yōna ya la Nawēnne wu bāma baseba n yuun yōm se'em, ti kūm maleka ku ba la.

¹¹ Bōn-bāma wuu yuun ēṅe ti yaabdōma ti la dena la māmsgo bō nērba baseba. La ba gulse bela, ti la dena la zāsṅo bō tōma seba n boe wakat-ēna ti dūnia lem ba'asgo wā. ¹² Bela, nērseka n tē'ese ti ēṅa iti sōṅa dee ze sōṅa, a guuse da lui. ¹³ Makre seba n paari ya la, la de la makre bāma n mē makri nērba baseba. La Nawēnne de la sira dāana, a kān base ti makre seka n gānni ya pāṅa paage ya. La makre puam, a wun bō ya pāṅa ti ya wībe, dee ēṅe sore ti ya yese.

^b 10:7 La daan de la бага de'eṅo ti ba de'eni, dee ita yalst.

Baga dia, la Zuudāana kūm tēere dia yelle

¹⁴ Bela m sobiisi, yese ya ya mēja бага kāabgo puam.

¹⁵ Mam togru bo'ora ya wu ya de la nēr-seba n tart yem. Ya mēja tē'ese mam n yeti ya sela la vōore. ¹⁶ Bōn-yūula la ti tōma ēn dīke pu'vse Nawēnne dee yū la, pa'ale ti tōma lagum na Krisi dena ayula a zum n yese bo tōma la īyā. La borbortu la ti tōma ēn fiise pu taaba obe la, pa'ale ti tōma lagum na Krisi dena īyā ayula. ¹⁷ Borbortu la n de ayula la, tōma mē de la īyā ayula, baa tōma n zo'oge la. Se'ere n soe la, ti wuu lagum obra la borbor-ēja ayula.

¹⁸ Tē'ese ya lrayelt dōma yelle. Seba n diti di-seba ti ba dīke kāabe Nawēnne kāabgo bīnbīnne zuo la, ba lagum na Nawēnne. ¹⁹ Bēm ti mam yeti wāna? Yāma tē'ese ti mam yeti bagre, bu di-seba ti ba kāabe bo bagre la, de la sela bu? Ayet. ²⁰ Mam yeti ya me ti ya bāje ti sela ti bag-kāabrūba kāabrū la, ba kāabrū bo'ora la kulkā'arst, dagu Nawēnne. Mam ka boortu ti ya lagum na kulkā'arst. ²¹ Ya ka

tā wun yū Zuudāana Azezi bōn-yūula, dee le yū kulkā'arst bōn-yūula, ya ken ka tāna wun di Zuudāana kūm tēere dia, dee le di kulkā'arst dia. ²² Ti sān ita bela, ti wun botu Zuudāana sūure n isge. Yāma tē'ese ti tōma tart pāja gānna ē me bu?

Nā'asra ya Nawēnne yāma n uti sela woo puam

²³ Yāma nērba baseba yeti: «Sore boe me ti ti ēje sela woo.» Asra, la, la dagu sela woo n tart yōoro. Ba yeti: «Sore boe me ti ti ēje sela woo.» La, la dagu sela woo n sōjrt. ²⁴ Nēra nēra da eera a mēja sōjre mā'a, eera ya taaba sōjre.

²⁵ Ya tart sore ti ya da nēn-seba wuu ti ba koosru da'ast puam obe me. Da base ya ti la nāmsra ya putē'era ti ya soke nēnno na n ze'ele zē'a. ²⁶ La gulse Nawēnne gōjgo puam yeti: «Dūnia la bōn-seba wuu n boe a puam de la Zuudāana Nawēnne bōno.»

²⁷ Nēra n ka bo Azezi sira sān wi ya ti ya wa'am a yire wa di, ti ya sake sēje, di ya di-seba wuu ti a tart wa bo ya la, da base ya ti la nāmsra ya putē'era,

tu ya soke nēnno na n ze'ele zē'a. ²⁸ La nēra sān yeles ya yeti: «Di-bāna wā de la bagre dia», da di ya, seka n yeles ya bela la īyā, ti la da nāmse a putē'ere. ²⁹ La dagu yāma mēṅa putē'era yelle ti mam yeles, la de la nēr-seka n yeles ya la putē'ere.

La yāma mē tā soke mam yeti: «Bēm soe ti nēra ayēma putē'ere wun gu mam, ti mam kān di sela ti mam tarti nōore ti m di? ³⁰ Mam sān pu'use Nawēnne dia īyā dee di, bēm ti nēra wun zerge mam la bōn-seka ti mam pu'use Nawēnne a īyā?»

³¹ Bela, ya sān dita me, bu ya yūuri me, bu sela woo ti ya iti, ita ya ba wuu nā'asra Nawēnne. ³² Da ēṅe ya sela Zīfdōma, bu seba n dagu Zīfdōma, bu Nawēnne nērba zē'am ti la gu ba Nawēnne sore doosgo. ³³ Ita ya wu mam n iti se'em na. Mam mōrgri me ti m ēṅe sela n ān nēra woo sūure yēlum sela woo puam, mam ka eeri m mēṅa sōṅre, mam eeri la nērba zozo'e sōṅre, ti ba tā'age yē fāagre.

11

¹ Ita ya mam n iti se'em na,

wu mam mē n iti wu Krisi n iti se'em na.

Buraaga la pōka n wun āna se'em Wēndeto puam

² Mam pēgri ya, yāma n tēri mam yelle sela woo puam, dee dola bōn-seba wuu ti mam pa'ale ya la. ³ La mam boorti ti ya bāṅe ti Krisi de la nēra woo zuudāana, ti sira mē dena a pōga zuudāana, ti Nawēnne dena Krisi zuudāana. ⁴ Bela, bura-seka n pu'usri Nawēnne, bu n to'oge Nawēnne yetōga tōgra bō'ora nērba, dee vuge a zuugo, a pō'ori la a zuudāana. ⁵ La pōg-seka n pu'usri Nawēnne, bu n to'oge Nawēnne yetōga tōgra bō'ora nērba, dee ka vuge a zuugo, a pō'ori la a zuudāana. La ān wu ēn pōn a zuugo la. ⁶ Pōka sān ka bō'ora ti a vuge a zuugo, a yi se a zomto. La ti mi ti la de la yānne bō pōka ti a pōn a zuugo, bu a se a zomto. Bela, dēnti ti a vuge a zuugo. ⁷ Buraaga ka de a vuge a zuugo, se'ere n soe la, Nawēnne nāam ē ti a wōna la a mēṅa, dena nā'asgo bō ē. La pōka de la nā'asgo bō buraaga. ⁸ Nawēnne ka dūke pōka kōbre nāam

buraaga, a daan dike la buraaga kōbre nāam pōka. ⁹ La Nawēnne ka nāam buraaga pōka iyā, la a nāam pōka la buraaga iyā. ¹⁰ Bela iyā, la malekadōma iyā, la mase ti pōka vugra a zuugo ti la pa'ale ti a tarti nōore. ¹¹ La Zuudāana doosgo la puam, pōka boe la buraaga nu'usum, ti buraaga mē bōna pōka nu'usum. ¹² Nawēnne daan dike la buraaga nāam pōka. Ti pōgsti mē dōgra buraasi. Bela wuu ze'ele la Nawēnne zē'am.

¹³ Tē'ese ya, ya mēŋa bise. La mase ti pōka pu'usra Nawēnne nēr-kuvŋo puam dee ka vuge a zuugo? ¹⁴ Nērba wuu mi me ti buraaga sān base a zomto ti ba wōge, la de la yānne. ¹⁵ La pōka sān base a zomto ti ba wōge, la de la pēka bō ē. A zomto la n wōge la, de la sela bō ē ti a dike vuge a zuugo. ¹⁶ La nēr-seka sān bōora ti a wē nōke'ene bōn-ēna wā yelle, dēnti ti a bāŋe ti tōma, la Nawēnne nērba n boe zē'esti wuu la, ka tarti ɽgo ayēma.

Zuudāana kūm tēere dia

(*Amatie 26:26-29, Amarki 14:22-25, Aluki 22:14-20*)

¹⁷ Mam n yeti m yele ya se'em

wā, mam ka yeti m pēge ya, bēm iyā, ya ēn lagse taaba la, ya ka uti sōŋa, ya uti la be'em. ¹⁸ Pōspōsi, mam wōm ti ya sān ēn lagse taaba ti ya pu'use Nawēnne, welgre n boe ya tēŋasoka. La mam sake ti yel-seba ti ba yele la, baseba de la sira. ¹⁹ Dēnti ti welgre bōna ya tēŋasoka, ti ba bāŋe seba n siri doli Nawēnne bōke. ²⁰ Yāma ēn lagse taaba la, ya tē'ese ti ya diti la Zuudāana dia, la dagi bela. ²¹ Se'ere n soe la, ya sān lagse, nēra woo dēŋe ka dita la a mēŋa dia. Ti seba kom dōnna, dee ti baseba yū buge. ²² La sān dena bela, yāma ka tarti yie wun di dee yū bilam? Bu yāma ka nānti la Nawēnne nērba la, dee ita nāsdōma yānne? Mam wun yele ya ti bo? M pēge ya bela iyā bu? Ayeti, mam kān pēge ya.

²³ Zāsŋ-seka ti mam daan zāsum ya la, mam to'oge ē na Zuudāana la zē'am. La de la wāna: Yu'vŋ-seka ti ba wun yōke ti Zuudāana Azezi la, a dike la borbori, ²⁴ pu'use Nawēnne a yelsōnne dee fiise bō ba yeti: «Ēna de la mam iyā, ti mam bō'ori ya. Ita ya wāna tēra mam yelle.» ²⁵ Ban daan di

dia ki'ulum na, a dike la bōn-yūula yeti: «Bōn-yūul-bāna pa'ali ti Nawēnne bīje la nōore paalga la nērsaalba mam zum n wun yese la īyā. Wakat-seka ti ya ēn yeti ya yū ba, ita ya wāna tēra mam yelle.»²⁶ Wakat-seka woo ti ya obru borbort wā, dee yūura bōn-yūula wā, ya pa'ali la Zuudāana la kūm yelle, halt ti a wun wa leme wa'am.

²⁷ Bela, nēr-seka woo n obru borbort wā, dee yūura bōn-yūula wā, dee ka mase ti a obe dee yū, a tunni la tōon-be'ero po'ora Zuudāana īyā, la a zum na.²⁸ Bela, nēra woo tē'ese bise a sān mase, deege obe borbort la, dee yū bōn-yūula la.²⁹ Nēr-seka n ka nānni Zuudāana la īyā, dee obe borbort la, dee yū bōn-yūula la, a eert la sibgre bo'ora a mēja.³⁰ Bela n soe ti ya puam, nērba zozo'e dena bā'adōma, ti seba ka tara pāja, ti baseba ki.³¹ Ti sān tē'ese ti mēja bise ti sān mase, Nawēnne kān sibge to.³² La Zuudāana la sān sibgra to, a pa'ali ti me ti ti ita sōja, ti a da wa lagum to la dūnia nērba di ti sarīya sibge to.

³³ Bela, m sobiisi, ya sān lagse taaba ti ya di Zuudāana kūm

tēere dia la, ya gu'ura taaba.³⁴ Nēra kom sān dōnna, a di a yire dee wa'am, ti ya da kān lagse taaba ε sibgre bo ya mēja. La yel-seba n weege la, mam sān wa wa'am, mam wun maale.

Nawēnne Sia bo'a yelle

12

¹ Leele wā, mam yeti m tōge ya la Nawēnne Sia bo'a yelle. M sobiisi, mam boort ti ya bāje la bōn-ēja yelle sōja.² Ya mi ti yan daan nān ka bo Azezi sra la, ya daan taage la baga n de mugro la poore dōla, ka tāna wun base.³ Bela ti mam bo'ora ti ya bāje ti Nawēnne Sia la sān bona la nēra, a ka tā wun tōge Azezi yelle be'em. La nēra mē ka tā wun yeti, Azezi de la Zuudāana, ti la sān dagna Nawēnne Sia n botti a yeke.

⁴ Nawēnne Sia bo'a la de la to'oto'ore, la, la de la Sia ayila mēja n bo'ort.⁵ Tōoma la de la to'oto'ore, la, la de la Zuudāana ayila ti ti tunni bo'ora.⁶ Tōoma la n tunni se'em na de la to'oto'ore, la, la de la Nawēnne

ayula n tunni ba wuu nērba wuu puam. ⁷ Nawēnne Sia la b'ori nēra woo la b'a nērba la wuu sōṅre ñyā. ⁸ Sia la b'ori nēra ayula la b'a ti a tōgra yem yetōga, la Sia ēṅa ayula n b'ori nēra ayēma b'a ti a tōgra bāṅre yetōga. ⁹ La Sia ēṅa mēṅa n b'ori nēra ayula b'a ti a b'ora Nawēnne sira zozo'e, dee b'ora ayēma pāṅa ti a boti bā'adōma yēta ñmā'asum. ¹⁰ Sia la n b'ori nēra ayula pāṅa ti a tāna tunna tun-yālma, dee b'ora ayēma b'a ti a t'osra Nawēnne yetōga tōgra b'ora nērba, ēṅa n b'ori nēra ayula yem ti a tāna wun bāṅre sela n ze'ele Nawēnne Sia zē'a, la sela n ka ze'ele Nawēnne Sia zē'a bōke. Sia ēṅa n b'ori nēra ayula b'a ti a tāna tōgra yetōg-zāṅsi, dee b'ora ayēma b'a ti a tāna pa'ala yetōg-zāṅsi la vōore. ¹¹ La de la Sia ēṅa ayula n iti bela wuu. Sia la b'ori nēra woo la b'a to'oto'ore wu ēṅa n boori se'em.

**Azezi-krisi nērba ãn wu
nēra ayula ñyā la**

¹² Azezi-krisi nērba ãn wu ñyā ayula n tarti zē'est to'oto'ore. La baa la zē'est la n de to'oto'ore la,

ba wuu de la ñyā ayula. ¹³ Tōma Zifdōma, la seba n dagi Zifdōma, la seba n de yamsi, la seba n dagi yamsi, tōma wuu n daan mise ko'om puam na, Nawēnne Sia boti ti lebge la ñyā ayula. Nawēnne tōm na Sia ayula bō ti wuu.

¹⁴ Nēra ñyā ka tarti zē'a ayula mā'a. A tarti la zē'est to'oto'ore.

¹⁵ Nā'are sãn yeti, ēṅa n dagi nu'ugo la, ēṅa ka po dena ñyā la zē'a ayula, bela kãn tā'age base ti a kãn dena ñyā la zē'a ayula.

¹⁶ La tubre mē sãn yeti ēṅa n ka de nifo la, ēṅa ka po dena ñyā la zē'a ayula, bela kãn tā'age base ti a kãn dena ñyā la zē'a ayula.

¹⁷ Ti ñyā la wuu sãn de ni nifo, a yeti a ēṅe la wãne wōm yetōga? La a wuu sãn de ni tubre, a yeti a ēṅe la wãne wōm yūuṅo?

¹⁸ Bela ti Nawēnne ēṅe ñyā zē'a woo wu ēn boori se'em, lagum ba taaba. ¹⁹ Ba wuu sãn de ni la zē'a ayula mā'a, ñyā kãn boe ni. ²⁰ Bela ti zē'est to'oto'ore bōna, la ba de la ñyā ayula.

²¹ Bela nifo ka tā wun yeke nu'ugo yeti, ēṅa ka boori a sōṅre. La zuugo mē ka tā wun yeke nãma yeti, ēṅa ka boori ba sōṅre. ²² Lan pa'ase, ñyā la zē'e-

seba n ān wu ba ka tarti pāṅa la, tarti yōoro me. ²³ Zē'e-seba ti tōma bise ti ba ka tarti yōoro zo'oge la, ti bīsrī la bāma yelle sōṅa sōṅa. La zē'e-seba ti ti tē'ese ti ba ka mase ti nērba yē ba la, bāma ti ti malgrī sōṅa gānna. ²⁴ La ka de ti dīke sela pī zē'e-sōma la. Nawēnne mēṅa n ēṅe ti īyā la, base ti ti bīsrā zē'e-seba ti ti tē'ese ti ba ka tarti yōoro zo'oge la yelle sōṅa sōṅa, ²⁵ ti welgre da bōna īyā la puam. La ti īyā la zē'est to'oto'ore la wun sōṅra taaba. ²⁶ Bela, zē'a ayula sān nāmsra, zē'est la wuu mē nāmsrī me. Zē'a ayula sān yē nā'asgō, zē'est la wuu tarti la sū-yēlga.

²⁷ Ya wuu de la Krisi īyā la. La nēra woo de la īyā la zē'a ayula. ²⁸ Bela ti Nawēnne ēṅe nēra woo a zē'am a nēr-kvūḡo la puam. Pōspōsi de la seba ti Azezi mēṅa daan looge tōm ba la. Buyi dāana de la Nawēnne nōtō'ōsrība. Butā de la karēnsāamdōma, la seba n tunni tvun-yālma, la seba ti a bō ba pāṅa ti ba boti bā'adōma yēta īmā'asum, la seba ti a looge ti ba sōṅra nērba, la seba n wun bōna nērba nēṅa, la seba n togri

yetōg-zāṅsi. ²⁹ La dagi ti wuu n de seba ti Azezi mēṅa daan looge tōm na, dagi ti wuu n de nōtō'ōsrība, dagi ti wuu n de karēnsāamdōma. La dagi ti wuu n tarti pāṅa tunna tvun-yālma, ³⁰ la dagi ti wuu n boti bā'adōma yēta īmā'asum, dagi ti wuu n togri yetōg-zāṅsi, dagi ti wuu n tā wun pa'ale yetōg-zāṅsi la vōore. ³¹ Eera ya bō'a seba n gānni wuu.

La mam wun pa'ale ya sor-seka n gānni ba wuu.

Nōḡlum yelle

13

¹ Mam sān togra nērsaalba buuri wuu yetōga, la malekadōma yetōga, dee ka tara nōḡlum, mam ān wu dēnlōḡo bu purga n wē'eri zāṅa. ² La mam sān tara bō'a tō'ōsra Nawēnne yetōga togra bō'ora nērba, dee tāna wun bāṅe yela n sugē wuu vōore, dee tara mi'ilum wuu, la mam sān bō Nawēnne sra tāna wun boti tāṅa vurge, dee ka tara nōḡlum, mam de la zāṅa. ³ La mam sān dīke mam n tarti sela

wuu put nāsdōma, la baa mam sān sake ti ba yō mam iyā bugum, dee ka tara nōḡlum, bela ka tarti yōoro bō mam.

⁴ Nēr-seka n tarti nōḡlum mā'ari la a mēḡa, dee sōḡra nērba, a ka iti sūure, a ka wē'eri yō'ogo, la a ka zēkri a mēḡa.

⁵ Seka n tarti nōḡlum ka iti sela n ka mase, a ka eeri a mēḡa sōḡre mā'a, a sūure ka isgri, nēra sān ēḡe ē be'em, a ka tēri ē a sūure puam.

⁶ Seka n tarti nōḡlum ka iti sū-yēlga la tōon-be'ero, a iti sū-yēlga la sira.

⁷ Seka n tarti nōḡlum iti sugri me sela woo puam. A bō sira me sela woo puam, a tarti putē'ere me gu'ura sela woo ti a bō sira la, a tā wībra me sela woo puam.

⁸ Nōḡlum ka malun ba'asra. Nawēnne yetoga ti ti to'osri togra bō'ora nērba, la yetog-zāḡsti, la mi'ilum wun tole.

⁹ Tōma n mi se'em, la tōma n to'osri Nawēnne yetoga togra bō'ora nērba la, de la fēe. ¹⁰ La wakate sān wa paage ti Nawēnne malge sela woo ti la mase sōḡa sōḡa, sela fēe ti tōma mi la wun tole.

¹¹ Mam n daan de bia la, mam

daan togru wu bia la, mam daan tē'esra wu bia la, la mam daan wōnni yela vōore wu bia la. La mam yāḡa n bi la, mam base biyā'ate me. ¹² Tōma n mi sela leele wā, ān wu tōma bisri la bisga n ka yēti sōḡa puam. La wakat-ēḡa ti wun yē sela woo sōḡa. Mam n mi sela la, nān de la fēe. La mam wun wa bāḡe ē sōḡa sōḡa wu Nawēnne n mi mam sōḡa se'em na. ¹³ Bela, bōn-bāna batā n boe wakate wuu: La de la bō sira, la ti tara putē'ere gu'ura sela ti ti bō sira la, la nōḡlum. La bōn-bāna batā puam, nōḡlum n gānni ba wuu.

Ti wun ēḡe se'em ti

Nawēnne Sia bō'a la sōḡe nērba

14

¹ E ya nōḡlum, la ya ken eera Nawēnne Sia bō'a la, lan gānni, bō'a seka ti ya wun to'oge Nawēnne yetoga toge bō nērba.

² Seka n togru yetog-zāḡsti ka togru bō'ora nērba, a togru bō'ora la Nawēnne. Se'ere n soe la, nēra ka wōnni a yetoga la vōore, Nawēnne Sia boti a togra la yela n suge. ³ La seka n

to'osri Nawēnne yetōga tōgra bō'ora nērba, ēņa tōgrī sōņra la nērba, boti ba sēnna nēņa Nawēnne sore doosgo la puam, dee kā'ana ba, bō'ora ba buraane. ⁴ Seka n tōgrī yetōg-zāņsi sōņri la a mēņa. La seka n to'osri Nawēnne yetōga tōgra bō'ora nērba sōņri la Nawēnne nērba. ⁵ Mam boorti ni ti ya wuu tōgra la yetōg-zāņsi, la mam boorti ti ya tō'sra la Nawēnne yetōga tōgra bō'ora nērba gānna. Nēra sān tōge yetōg-zāņsi ti nēra ka bōna wun to'oge yetōga la tōge a vōore pa'ale nērba la, seka n to'osri Nawēnne yetōga tōgra bō'ora nērba la n gānni.

⁶ M sobiisi, mam sān wa'am ya zē'am wa tōgra yetōg-zāņsi, mam wun ēņe la wāne sōņe ya? A ka tarti vōore bō ya. Sela n wun sōņe ya, de la mam sān pa'ale ya sela ti Nawēnne Sia puke pa'ale mam, bu m boti ya bāņe sela, bu m to'oge Nawēnne yetōga tōge bō ya, bu m zāsum ya. ⁷ La ān wu de'eņo lōgro la: Wia sān peeبرا bura bura, bu kōļņō sān wē'era bura bura, fu wun ēņe la wāne bāņe wia la peeبرا vōore, bu kōļņō la wē'a vōore? ⁸ Benkonne sān peebe

bura bura, ka peebe zēbre peeبرا, āne n wun māasum yese zēbre? ⁹ Bela mē, ya sān tōgra yetōg-zāņka, ti nēra ka wōnni a vōore, nēra wun ēņe la wāne bāņe yāma n boorti ti ya yele se'em? Ya yetōga la de la zāņa. ¹⁰ Yetōga buuri zozo'e n boe dūnia zuo, la ayila ka boe ka tara vōore. ¹¹ La mam sān ka wōnna yetōga, mam na seka n tōgrī la de la sāama la taaba. ¹² Bela, yāma n mōrge eera Nawēnne Sia bō'a la, eera ya bō'a seba n wun sōņe Nawēnne nērba ti ba sēņe nēņa Nawēnne doosgo puam.

¹³ Bela iŷā, seka n tōgrī yetōg-zāņka, a sose Nawēnne ti a boti a yāņe tōge a vōore. ¹⁴ Mam sān pu'usra Nawēnne la yetōg-zāņka, mam sia n pu'usri, la mam ka wōnni a vōore la m mēņa yem. ¹⁵ Bela, mam wun ēņe la wāne? Mam wun pu'usra la m sia, dee ken pu'usra la m yem, la m yōona la m sia, dee ken yōona la m yem. ¹⁶ Fu sān pu'usra Nawēnne a yel-sōnne la yetōg-zāņka, nēra wun ēņe la wāne ze'ele nērba la n lagse la puam yeti «amina», dee ka wōm fōn yele se'em na vōore? ¹⁷ Baa

fōn pu'usrī Nawēnne se'em na sān āna sōḡa, la ka tarti sōḡre bō nēr-ēḡa. ¹⁸ Mam pu'usrī Nawēnne a yel-sōnne, mam n tōgrī yetōg-zāḡsī gānna yāma wuu la. ¹⁹ La Nawēnne nērba lagstōg zē'am, mam boortī ti m tōge la yetōga anuu la m yem ti nērba wōm ba vōore, ti la zāsūm ba, sōna mam wun tōge yetōg-zāḡsī tuspia.

²⁰ M sōbiisi, da āna ya wu kōma n tē'esrī se'em na. La, la sān dena be'em igrō yelle, āna ya wu kōm-pūgstī n ka tti be'em na. La ya tē'esgō puam, āna ya wu bōnkegstī la. ²¹ La gulse Nawēnne gōḡō puam ti Zuudāana Nawēnne yeti: «Mam wun base ti sāama n tōgrī yetōg-zāḡsī mōole m kō-yēlga bō m nērba. Baa la wāna wuu ba kān selse mam.» ²² Bela īyā, yetōg-zāḡsī de la sela n pa'alī seba n ka bō sira la, Nawēnne pāḡa, la dagī seba n bō sira la īyā. La nēra n to'oge Nawēnne yetōga tōge bō nērba la, n de sela n pa'alī seba n bō sira la, Nawēnne pāḡa, la dagī seba n ka bō sira la īyā.

²³ Seba n bō sira la sān lagse taaba zē'a ayula, ti nēra woo

tōgra la yetōg-zāḡsī, ti seba n ka mi, dee ka bō Nawēnne sira kē, ba kān yeti ya zallī mē? ²⁴ La seba n bō sira la sān lagse taaba, ti nēra woo tō'sra Nawēnne yetōga tōgra bō'ora nērba, ti nēra n ka mi, dee ka bō Nawēnne sira kē, ēn wōm sela woo la, wun base ti a bāḡe a tōon-be'ero, dee pa'ale ē a tuure. ²⁵ Yel-seba n sūge a sūure puam wun puke mē peelem puam, ti a wun ka dūma dīke a nēḡa vōgle tēḡa pēḡe Nawēnne, dee yeti, Nawēnne siri boe la ya le.»

Ita ya sela woo ti ba dōla sore

²⁶ Bela, m sōbiisi, ti wun ēḡe la wāne? Ya sān lagse taaba ti ya pu'use Nawēnne, ya nēra ayula tā wun pure yuune, ti ayēma zāsūm, ti ayēma pa'ale bōn-seka ti Nawēnne puke pa'ale ē, ti ayēma tōge yetōg-zāḡka, ti ayēma tōge yetōg-zāḡka la vōore pa'ale nērba. Ita ya bela wuu ti la sōḡe Nawēnne nērba ti ba sēḡe nēḡa Nawēnne doosgo puam. ²⁷ La sān dena yetōg-zāḡsī ti ya yeti ya tōge, nērba bayi bu nērba batā mā'a tōge ayula ayula, ti nēra ayula

toge ba vōore pa'ale. ²⁸ La nēra sān ka bōna wun tā'age toge yetog-zāņsi la vōore pa'ale, seba n yeti ba toge yetog-zāņsi la sīna da toge. Ba toge ba sūure puam bō ba mēņa, la Nawēnne.

²⁹ Seba n de Nawēnne nōtō'bsruba la, bayi bu batā toge. Ti seba n weege la bise ba yetoga la sān mase bu ka mase. ³⁰ La nēra ayila sān togra, ti Nawēnne Sia puke sela pa'ale nērba lagsiḡo la zē'am, nēr-seka n dēņe togra la go'oge. ³¹ Ya wuu tā wun to'oge Nawēnne yetoga toge bō nērba mē, la ya togra ayila ayila, ti la wun zāsum nērba wuu, dee bō ba buraane. ³² Nēr-seba n tarti Nawēnne Sia to'osra yetoga bō'ora nērba la tā wun yōke ba mēņa mē. ³³ Se'ere n soe la, Nawēnne boorti ti sela woo dōla la sore la sū-ma'asum, a ka boorti ti ti tunna yooro yooro.

³⁴ Pogsu sīna Nawēnne nērba lagsiḡo zē'am, wu ba tti se'em zē'esti wuu la. Sore ka boe ti ba dare togra Nawēnne nērba lagsiḡo zē'am. La ba sakra nōore wu Zīfdōma tā'are n yeke se'em na. ³⁵ Sela sān bōna ti ba boora ti ba bāņe, ba soke ba

surba ba yie. La ka narti ti pogsi togra Nawēnne nērba lagsiḡo zē'am.

³⁶ Yāma tē'ese ti la de la yāma zē'am ti Nawēnne kō-yēlga la pose bu? Bu yāma mā'a n to'oge yetoga la? ³⁷ Seka n tē'ese ti ēņa de la Nawēnne nōtō'bsa bu ēņa de la seka ti Nawēnne Sia boe la ē le, a sake ti sela ti mam gulse bō'ora ya wā de la Zuudāana la nōore ti a bō. ³⁸ La nēra sān ka selse yel-ēna, yāma mē da selse ē.

³⁹ Bela, m sobiisi, mōrge ya to'osra Nawēnne yetoga togra bō'ora nērba, dee da gu ya nērba ti ba da toge yetog-zāņsi. ⁴⁰ La uta ya sela woo ti la āna sōņa, dee dōla sore.

Krisi kūm vo'ore yelle

15

¹ M sobiisi, leelee wā mam boorti ti m tēge ya la kō-yēlga la ti mam daan mōole bō ya, ti ya bō sira ze kāņkāņe la yelle.

² Ya sān gure ē kāņkāņe wu mam n mōole ya se'em na, ya wun yē fāagre. La sān dagna bela, yan bō sira la de la zāņa.

³ Zāsņ-seka n gānni ti mam

daan to'oge n bela ti mam dēje zāsūm ya:

Krisi ki la tōma tōon-be'ero īyā,

wu lan gulse Nawēnne gōḡo puam se'em na.

⁴ Ti ba daan laage ē, ti Nawēnne boti a vo'oge dabsa atā daare,

wu lan gulse Nawēnne gōḡo puam se'em na.

⁵ La a daan dēje dike a mēḡa pa'ale la Apuyēeri, dee yāḡa dike a mēḡa pa'ale tōntōnba pia la ayi la.

⁶ Bela poorum ti a dike a mēḡa pa'ale a karēnbiisi n gānnu kōbsnuu wakate ayila.

Ba nērba baseba zozo'e ken voa me, la baseba ki me.

⁷ Bela poorum ti a dike a mēḡa pa'ale Azaki dee yāḡa dike a mēḡa pa'ale tōntōnba la wuu.

⁸ Bela wuu poorum, a dike a mēḡa pa'ale la mam n ān wu bia ti ba doḡe ti a wakate ka paage la. ⁹ Mam de la pika tōntōnba la wuu zē'am, dee ka nara ti ba wi'ira mam ti tōntōnna, mam n daan nāmse Nawēnne nērba la īyā. ¹⁰ La Nawēnne yel-sōnne īyā ti mam dena mam n de

se'em lēele wā. Yel-sōnne na ti Nawēnne bō mam na dagi zāḡa. Mam tum gānna tōntōnba baseba la wuu me. La, la dagi mam mēḡa n tunni bela, Nawēnne yel-sōnne na īyā ti mam yāḡe tunna bela. ¹¹ Bela, la sān dena la mam n mōole kō-yēlga la, bu bāma, ti wuu mōole la kō-yēlga seka ti mam tēege ya a yelle la, seka ti ya daan sake la.

Kūm wuu vo'ore yelle

¹² Tōma n mōoli ti Krisi ki me dee vo'oge la, wāne ti ya nērba baseba yeti, seba n ki la kān vo'oge? ¹³ La sān dena sira ti nēr-seba n ki la kān vo'oge, bela Krisi yi ka vo'oge. ¹⁴ La Krisi sān ka vo'oge, kō-yēlga la ti tōma mōoli la de la zāḡa, ti yāma bō sira la mē dena zāḡa. ¹⁵ La sān dena bela, tōma yi parni me bō'bra Nawēnne, tōma n yeti, Nawēnne boti Krisi vo'oge me, dee ti kūm kān vo'oge la īyā. ¹⁶ Seba n ki la sān kān vo'oge, bela, Krisi yi ka vo'oge. ¹⁷ La Krisi sān ka vo'oge, yan bō sira la de la zāḡa, la ya tōon-be'ero taale ken bona la ya zuto. ¹⁸ La seba n bō

Krisi sura dee ki la mē yi bō me. ¹⁹ Tōma n taru putē'ere la Krisi la sān dena la tōma n vōa dūnia wā zuo mā'a īyā, tōma n yi de ninbāaldōma gānna nērsaalba wuu.

²⁰ La, la dagi bela, Krisi ki dee vo'oge me, ēḡa n de pōspōsti dāana n vo'oge pa'ale ti nērba baseba n ki la mē wun vo'oge.

²¹ La de la nēra ayula īyā ti nērba kiira, bela, la mē de la nēra ayula īyā ti kūm wun vo'oge. ²² Nērsaalba wuu de la Adam yusti, bela ti ba kiira.

Bela ti nēr-seba wuu n mē de Krisi nērba wun vo'oge. ²³ La nēra woo taru la a wakate, pōspōsti de la Krisi n vo'oge, la a wa'aḡo daare, seba n de a nērba la wun vo'oge me. ²⁴ Bela poorum, Krisi wun sā'am seba wuu n soe ke'eḡo, la na'am, la pāḡa wuu, dee yāḡa dike so'olum na lebse bō a So

Nawēnne, dee ti sela woo ba'ase. ²⁵ Bela, dēnti ti Krisi di na'am halt ka paage wakat-seka ti Nawēnne wun boti a be'eba wuu bōna a nāma tēḡa. ²⁶ Kūm n de be-seka ti a wun wa sā'am poorum. ²⁷ La gulse Nawēnne gōḡo puam yeti: «Nawēnne dike

sela woo ēḡe la a nāma tēḡa.» Lan yeti Krisi n soe sela woo la, la ka tāti a sōna Nawēnne mēḡa n boti a sōna sela woo la.

²⁸ La Nawēnne sān dike sela woo ēḡe Krisi nu'usum, ēḡa n de Nawēnne Dayua la mē wun dike a mēḡa ēḡe Nawēnne nu'usum. Ti Nawēnne dena nēḡadāana sōna sela woo.

²⁹ Seba n ki la sān kān malun vo'oge, nēr-seba n boti ba misra ba ko'om puam seba n ki īyā la, wun ēḡe la wāne? Kūm sān kān malun vo'oge, bēm ti ba ita bela? ³⁰ La bēm ti tōma pōsra ti yōore wakate wuu? ³¹ M sōbiisi, mam pōsru m yōore me daare woo, mam n yeti ya se'em na de la sura. La de la sura wu mam n uti sū-yēlga ya yelle yāma n doli Zuudāana Azezi-krisi īyā se'em na. ³² La sān dena la dūnia zuo vom mā'a īyā, mam n daan yē yela Efeesti tēḡa wu mam zebri la we-dūnsi la, a yōoro de la bēm? La sān dena ti kūm kān vo'oge, ti wun yeletu wu nērba baseba n yeti se'em na: «Base ya ti ti dita dee yūura, ti beere ti wun ki me.»

³³ Da pā'ase ya ya mēḡa. Fu sān dōla nēr-be'ego, fō wun

lebge la nēr-be'ego. ³⁴ Base ya tē'ese yooro, dee da le tunna tōon-be'ero. Mam yetu ya ti la de la yānne bō ya. Ya nērba baseba ka mi Nawēnne.

Seba n wun vo'oge la ĩyā n wun āna se'em

³⁵ La nēr-seka wun soke yetu: «Seba n ki la wun vo'oge la wāne wāne? Ba wun wa tara la ĩyā bēm buuri?» ³⁶ Sokre ēna de la gōon-sokre! Fōn ka mi ti fu sān bure sela biire, a yem n wun bule yese vōa, dee ti a pōkō pō'oge? ³⁷ La sān dena la ke-biire bu sela ayēma biire ti fu dīke bure, a de la biire mā'a. La a sān yese, a ka le āna wu seka ti fu bure la. ³⁸ Nawēnne boti bōn-buuri la yesra āna wu ēja n boort ti ba āna se'em na. Bōn-buuri woo n yesru āna se'em de la to'oto'ore.

³⁹ Bōn-vōosū mē ka tarti ĩyā ayula. Nērsaalba ĩyā de la to'ore, dūnsi ĩyā de la to'ore, niinto ĩyā de la to'ore, ti zūma ĩyā mē dena to'ore. ⁴⁰ Bōn-seba n boe saazuum tarti la ba ĩyā, ti seba n boe tēja zuo mē tara ba ĩyā, la ba sōja dagi ayula. ⁴¹ Wēntule peelem boe la a to'ore, ti wōrga

peelem bōna a to'ore, ti wōrbea peelem mē bōna ba to'ore. La wōrbea la peelem mē le bōna la to'oto'ore.

⁴² Kūm vo'ore la mē wun wa āna la bela. Nēra sān ki ti ba laage ē, a ĩyā pō'ortu mē. La Nawēnne sān wa vo'oge ē, a kān le pō'oge. ⁴³ Ba sān laage kūm, a lōre mē dee dena gille. La a sān vo'oge, a ān na sōja, dee tara pāja. ⁴⁴ Ban laage ē na, a tarti la dūnia zuo ĩyā. La Nawēnne sān wa vo'oge ē, a tarti la ĩyā ti Nawēnne Sia bō ē. Dūnia zuo ĩyā boe mē, la ĩyā ti Nawēnne Sia bō'ortu mē boe mē.

⁴⁵ La gulse Nawēnne gōjō puam yetu: «Adam n de pōspōsti nēra la, Nawēnne n bō ē vōm.» La Kriisi ti ba wi'iri ti poorum Adam na, tarti la Sia n bō'ortu vōm. ⁴⁶ La dagi ĩyā ti Nawēnne Sia bō'ortu la, ti ti to'ortu yien. Ti to'ortu la dūnia wā ĩyā yien, dee yāja wun to'oge ĩyā ti Nawēnne Sia bō'ortu. ⁴⁷ Nawēnne daan dīke la tēja tēntōnnō nāam pōspōsti nēra la. La poorum nēra la ze'ele la Nawēnne yire wa'am.

⁴⁸ Dūnia nērba wuu ān wu nēr-seka ti Nawēnne daan dīke tēja tēntōnnō nāam na. Ti Nawēnne

yire nērba mē āna wu nēr-seka n daan ze'ele Nawēnne yire wa'am na. ⁴⁹ Bela, tōma n ān wu nēr-seka ti Nawēnne duke tētōnno nāam na, ti mē wun wa āna wu nēr-seka n ze'ele Nawēnne yire wa'am na.

⁵⁰ M sobiisi, bela ti mam gulse yele ya ti, nērsaala īyā wā kān tā'age kē Nawēnne so'olum puam. Īyā wā n pō'ort la, kān tā'age yē vom n ka ba'asri.

⁵¹ Selse ya ti m yele ya yelle n sugē. Tōma nērsaalba wuu kān ki dee ti dūnia ba'ase, la ti wuu īisi wun teege mē. ⁵² Dūnia ba'asgo daare, benkonne n wun peebe, ti ti wuu teege toto nini kābsgo puam. Benkonne na sān peebe, seba n ki la wun vo'oge la īyā n kān malun ki, la Nawēnne wun teege tōma īyā mē. ⁵³ Dēnt ti nērsaala īyā wā n pō'ort la lebge īyā n ka pō'ort, ti īyā n kiiri la, lebge īyā n ka kiiri. ⁵⁴ La īyā n pō'ort la, sān lebge īyā n ka pō'ort, ti īyā n kiiri la, lebge īyā n ka kiiri, wakat-ēja ti Nawēnne gōho n gulse se'em na wun ēje. La gulse yeti:

«Nawēnne yāje kūm,
ti kūm ka le bōna.

⁵⁵ Kūm, fu pāja boe la be?

Fu toogo boe la be?»

⁵⁶ La de la tōon-be'ero n boti kūm tara pāja kuvra nērba. Ti tā'are boti tōon-be'ero yēta pāja. ⁵⁷ Ti pu'use Nawēnne a yel-sōnne, ēja n bo tōma pāja ti tōma yāje tōon-be'ero la kūm, Zuudāana Azezi Kriisi īyā la.

⁵⁸ Bela, m sobi-nōhristi, mōrge ya ze'ele kānkāje. Tunna ya Zuudāana tōoma la wakate wuu da base, yāma n mi ti nāmsgseka ti ya nāmsri Zuudāana la īyā dagi zāja la.

Ba lagse ligri ti ba sōje Nawēnne nērba n boe Zerizalem

16

¹ Leele wā, mam boort ti m toge la ligri la ti ya lagsri ti ya sōje Nawēnne nērba la yelle. Doose ya pa'al-seka ti mam pa'ale Nawēnne nērba la n boe Galati so'olum na. ² Lasri daare woo, nēra woo looge lig-seba ti a yeti a bo la bīje, da ze ya gu'ura ti mam sān wa paam, ti ya yāja lagse. ³ Ti mam sān wa paam, mam wun gulse la gōho tōm nēr-seba ti ya mēja wun

looge la, ti ba tarti b'oa la sēje Zerizalem. ⁴ La, la sān le nara ti mam mēnja sēje, bāma wun doose la mam ti ti sēje.

Apoli tōgru a sore sēnne yelle

⁵ Mam wun wa'am ya zē'am, la mam wun doose la Masedvanti so'olum wa'am. ⁶ La mam sān wa'am, mam wun yuuge ya zē'am fēe, bu tā ti mam wun bōna la ya ti ɔɔɔ wakate wa tole, ti ya sōje ma ti m sēje zē'e-seka ti mam wun sēje la. ⁷ Mam ka boortu ti m wen doose bise ya dee tole, mam tarti putē'ere ti mam wun bōna ya zē'am yuuge, Zuudāana la sān bō mam sore. ⁸ La mam wun weege bōna la Efeest tēja halt ka paage Pāntekoti kibsadaare. ⁹ Se'ere n soe la, Nawēnne yo'oge la sore bō mam ti m tum a tōoma zozo'e, baa be'eba n zo'oge la.

¹⁰ Atimōti sān wa'am ya zē'am, ya to'oge ē sōja, dee ēje ya wun ēje se'em ti a buraane da bo'oge. Se'ere n soe la, a tunni Zuudāana tōoma la wu mam n tunni se'em na. ¹¹ Nēra nēra da p'ōge ē, sōje ya ē ti a

leme wa'am mam zē'am la sūmā'asum. Mam, la sōbiisi la gu'uri ē me.

¹² La sān dena ti sōbia Apolsti, mam yelee ē me nōore faa ti a doose la sōbiisi baseba la wa'am wa bise ya. La a ka boortu ti a wa'am lēele wā. A sān wa yē nēja, a wun wa'am.

Ba'asgo yetoga, la pu'usgo

¹³ Guuse ya, ya mēja ze kājkāje Nawēnne sore doosgo la puam. Keje ya mēja, tara ya buraane. ¹⁴ Ita ya sela woo la nōjulum.

¹⁵ M sōbiisi, ya mi Astefanasi la a yire dōma yelle, bāma n dēje bō Nawēnne sira Akayi so'olum puam. Ba tum me bō Nawēnne nērba. Mam belni ya me ¹⁶ ti ya nanna nēr-bāma, la nēr-seba wuu n tunni Nawēnne tōoma wu bāma la.

¹⁷ Mam tarti sū-yēlga me Astefanasi la Afortunatusi la Akayikusi n wa'am na. Se'ere n soe la, ba sōje mam wu yāma n boe mam zē'am na. ¹⁸ Ba keje mam, la yāma sūure me. Pēgra ya nēr-bāma buuri.

¹⁹ Nawēnne nērba n boe Azi so'olum pu'usru ya. Akila, la

1 Korēnti 16

Aprisili, la Nawēnne nēr-seba n lagsrı ba yire la pu'usrı ya sōŋa Zuudāana Azezi doosgo puam.

²⁰ Sobiisi la wuu pu'usrı ya. Pu'vse ya taaba la nōŋlum.


²¹ Mam Apolı n gulse pu'vsgo wā la m mēŋa nu'ugo, mam pu'usrı ya.

²² Nēr-seka n ka nōŋe Zuudāana la, kā'a-be'ego boe a dāana zuo. Maranata^c.

²³ Tı Zuudāana Azezi yel-sōnne wun bona la ya.

²⁴ Mam nōŋe ya wuu me Azezi-Krisi doosgo puam.

^c **16:22** Maranata de la Aramēyē yetoga n boortı tı a yetı, tōma Zuudāana sēm me.



Gõņo la zāsņo



Sapitru 1

Karēņe-ya Tōoma gōņo sapitru 18.

Bilam pa'alt ti Apolt yuvn sēņe la Korēnti tēņa ka mōole Azezi kō-yēlga bō nērba, ti ba sake. A ēņe la yuvne la pusuka bilam zāsūm ba. Bela poorum ti Apolst mē daan wa'am mī wa zāsūm ba Nawēne gōņo yela pa'ase (18:27-28). Korēnti boe la Akayi so'olum pvam.

Karēņe-ya Korēnti gōņo sapitru 1.

Apolt gulse gōņo wā bō la Nawēne nērba n boe Korēnti tēņa la. La dagi nēra n sēnti Wēndem mā'a ti a de Nawēne nēra. Nawēne nērba de la seba ti Nawēne wi ba ti ba welge to'ore sakra Azezi-Krisi la.

Apolt gulse gōņo wā bō la Korēnti dōma mā'a bu la ken dena la tōma ĩyā? (Karēņe-ya 1:2 lerge.)



Bēm ti Nawēne bō tōma Azezi-Krisi ĩyā? (Karēņe-ya 1:5 lerge.)



Tōma sān gvre Krisi kō-yēlga la kāņkāņe, a wun ēņe la bēm bō tō? (Karēņe-ya 1:6-8 lerge.)




1)

2)

3)

Karēņe-ya dee gulse sela n pɔ'ogɛ pa'asɛ.

Apoli kā'an Nawēnne nērba ti _____  da bɔna ba tēņasuka. Ba mase ti ba ēņe _____ ayɫa, tara _____ ayɫa la taaba.

(Sapitru 1:10.)

Krisi n ki kūm dɔ-puurņa zuo yetɔga la de la _____ bɔ nēr-seba n ka yē fāagre la. La tōma seba n yē fāagre la mi ti la de la _____.

(Sapitru 1:18.)

Nawēnne n looge nēr-seba la mi ti Krisi de la āne ?

(Karēņe-ya 1:24 lerge.)

Āne yem la āne pāņa n gānnt nērsaalba yem la ba pāņa ?

(Karēņe-ya 1:25 lerge.)

Bēm ĩyā ti Nawēnne looge nērba zozo'e n ka tart dūnia yem, la pāņa ? (Karēņe-ya 1:29 lerge.)

Tōma n de Azezi nērba la mase ti ti wē yō'ogɔ la bēm ĩyā ?

(Karēņe-ya 1:31 lerge.)

Zāsum ya **sapitri 1:30** mina ē na zuugo.

**³⁰ Azezi-Krisi ĩyā tu tu tara Nawēnne yem,
dee mase Nawēnne nējam,
welge to'ore lebge a nērba n yese tōon-be'ero puam.**

Sapitri 2

Karēņe-ya Korēnti gōņo sapitri 2.

Apoli n mōole Azezi-krisi kō-yēlga la, a yetōga la zuo de la bēm ?
(**Karēņe-ya 2:2 lerge.**)

Bēm ĩyā ti Apoli yeti ēņa ka mōole la nērsaalba yem ?
(**Karēņe-ya 2:5 lerge.**)

Nēr-seba n selsri Nawēnne yetōga la, dēnti tu ya sake Azezi dee bo ē
stra ya vom na wuu puam, la dagi ya sake karēnsaama mēņa yetōga
mā'a.

Da boora ya tu ya dīke nēra la ēņe nēņa sake ē a mi'ilum bu a
bōntarsōm ĩyā, dee yīm Azezi yelle.

Bēm n pa'ale ti seba n soe dūnia wā daan ka mi Nawēnne yem ?
(**Karēņe-ya 2:8 lerge.**)

Ãne n wun sŏŋe tŏma ti ti tã'age bãŋe bŏn-seba wuu ti Nawēnne
bŏ tŏ ? (Karēŋe-ya 2:12 lerge.)

Ãne n mi yel-seba n ze'ele Nawēnne Sɩa zē'am la vŏore dee tãna wun
bãŋe sela woo n ãn se'em bŏke ? (Karēŋe-ya 2:14-15 lerge.)

Zãsum ya sapitri 2:9 mina ē na zuugo.

**⁹ Bŏn-seba ti Nawēnne mãasum ti a bŏ nēr-seba
n nŏŋe ē na, gãnni bŏn-seba wuu ti nēra nãn ka yē,
bu wŏm, bu tē'ese a putē'erum.**

Sapitri 3

Karēŋe-ya Korēnti gŏŋŏ sapitri 3.

Ãndŏma n ãn wu ba de la bileesti Krisi doosgo la puam ?
(Karēŋe-ya 3:1 lerge.)

Ya sãn ita sũure zebra la taaba, la pa'alu la bēm ?
(Karēŋe-ya 3:3 lerge.)

Nērba baseba sãn yeti, bãma dolu la Abõno bu Abõno, la ka tarti võore. La sãn dena Nawēne nērba tējasuka, la ka mase ti ti bisra ti nēra ayula n gãnni ayēma.

Apoli yeti, ba wuu de la Nawēne tuntõniba. Bela nēra woo tõnni la tuun-kãna ? (Karēne-ya 3:5 lerge.)

Apoli dıke la bēm mãmsra ba Tõoma la ? (Karēne-ya 3:6-8 lerge.)

Seka n selli la, la de la bēm Tõoma ti a tõnni?

Seka n basri ko'om na, la de la bēm Tõoma ti a tõnni?

Åne n tarti võore gãnna: Seka n selli la, bu seka n basri ko'om na, bu Nawēne n botti ba buta la ?

Apoli le dıke la bēm mãmsra ba Tõoma la ?
(Karēne-ya 3:10-17 lerge.)

Bēm ãyã ti Apoli yeti, nãra woo guuse a mēja la ěn mēti se'em na ?

Azezi wa'ajo daare, bēm n wun ěje nãra woo Tõoma ?

(Karēje-ya 3:13 lerge.)

Nãra sãn tum sõja, bēm wun ěje ? (Karēje-ya 3:14 lerge.)

Nãra sãn ka tum sõja, bēm wun ěje ? (Karēje-ya 3:15 lerge.)

Nawēne wun dike la bugum make nãra woo Tõoma n ãn se'em, la boori ti la yeti a wun bise la nãra woo n tum se'em: nãra sãn tum a mēja ãyã, la de la dũnia wã bõno, la de la wakate fẽfẽe ãyã, la bugum n wun di a Tõoma la. La nãra sãn tum Nawēne ãyã, la de la wakate n ka ba'asri ãyã, la bugum kãn di a Tõoma la.

Bela nēr-seba n tōnni eera ba mēja yu'ure dũnia wã zuo la, Azezi wa'ajo daare, a wun paale ti a dãana Tõoma ka tarti yōoro. Nēr-seba n tōnni eera ti Azezi yẽ pēka la, bãma Tõoma n tarti yōoro Nawēne zẽ'am.

Nawēnne nēriba ān wu deego la ti a Sta bōna a puam.

Bēm ti Nawēnne dīke ti la dena ēbre la. (Karēņe-ya 3:11 lerge.)

Ēbre ayēma ka le bōna ti nēra wun ēebe.

Nawēnne wun ēņe nēr-seba n sã'am a deego la la wāne?

(Karēņe-ya 3:16-17 lerge.)

Nēr-seba n sã'am Nawēnne deego, de la nēr-seba n tōnnu be'em Nawēnne nēriba tēņasuka boti ba ka le dōla Nawēnne sōņa la.

Nēra sãn tē'ese ti ēņa n tarti dūnia wã yem na, a mase la Nawēnne Tōoma, a pã'ase la a mēņa. Bela la ka mase ti ti ita la bēm ?

(Karēņe-ya 3:21 lerge.)

Sapitri 4

Karēņe-ya Korēnti gōņo sapitri 4.

Nawēnne dīke a yela n daan sūge la ēņe Krisi tuntōntiba la nu'usum ti ba ita la bēm ? (Karēņe-ya 4:1 lerge.)

Ba sãn díke tũne ẽje nẽra nu'usum ti a bũsra, ba boort ti a dena la bẽm ? (Karẽje-ya 4:2 lerge.)

Nẽrba sãn nã'ase tũ bu ba sãn zerge tũ, la pa'ale ti tũma tarti buuro bu tũma ka tarti buuro ? (Karẽje-ya 4:3-4 lerge.)

Tũma mẽja sãn tẽ'ese ti ti ẽje sũja, la seke me bu ? (Karẽje-ya 4:3-4 lerge.)

Ãne n wun di tũma sariya ? (Karẽje-ya 4:3-5 lerge.)

Ti Zuudãana la sãn wa'am, a wun ẽje la wãne? (Karẽje-ya 4:5 lerge.)

Bẽm pa'alũ ti tũma sãn wẽ'era yũ'ogo nẽra ãyã bu ti sãn zẽke ti mẽja, tũma ka tarti buuro ? (Karẽje-ya 4:6-7 lerge.)

Apoli n soke sokrist la, a boori ti a pa'ali la Korēnti dōma ti ba ka ēje sōṅa. Apoli kā'an ba la ba zēk-m-mēṅa la ñyā, dee pa'ali ba ti la ka mase ti ba tē'esra bela.

Apoli n yeti: <Ya tē'ese ti yāma pōn tara Nawēnne bōntarsōm na wuu ti la seke me > na, a pa'ali ba me ti ba wun tā'age tara Nawēnne bōntarsōm na wuu ti la seke me Nawēnne yire, la dagi leelee wā.

Nērba sān tē'ese ti ba pōn tara sela woo bu ba pōn mase Nawēnne zē'am sela woo puam me, la boti ba zēkra la ba mēnsti, la ka ān sōṅa.

Bēm ti Kōrenti dōma tē'ese, ti Apoli boora ti a yeti la ka ān sōṅa ti ba tē'ese bela ? (Karēṅe-ya 4:8 la 4:10 lerge.)

Apoli n yeti: <Tōma ān wu zollɔ Kriisi ñyā > la, la boori ti la yeti bēm ? (Karēṅe-ya 4:10 dee le karēṅe 1:18-21 lerge.)

Karēṅe-ya dee gulse sela n pɔ'oge pa'ase.

Apoli ka gulse ti a boti yānne yōke ba, a yeti a _____
ba me wu a _____ ti a _____ la.

(Sapitri 4:14)

Apoli fable zozo'e me Korēnti dōma īyā. Ēn mōoli kō-yēlga bō ba ti ba yē vōm na īyā, a nōŋe ba zozo'e me, wu sō n nōŋe a kōma se'em na. Bela ti a kā'am ba bōra ti ba bāŋe Nawēnne sira, le dōla ē la ba sūure wuu.

Nēr-seba n bi Nawēnne doosgo puam, dēni ti ba zāsum nērba baseba sōŋa sōŋa, dee pa'ale ba ba tuure. La dēni ti ba ēŋe bela la nōŋlum.

Bela, ti Apoli yeti : Mam belni ya me ti ya ita

(Sapitri 4:16)

Nawēnne nērba ka tā wun kā'am nērba baseba, ti ba mēŋa yel-ire sān ka dōla Nawēnne yetōga n yeke se'em na sōŋa sōŋa.

Apoli yeti : Mam n vōa se'em Krisi doosgo la puam na, la de la bōn-bāma ti mam zāsni nērba. (Sapitri 4:17)

Dēni ti tōma vōm, la tōma yel-ire wuu, la tōma yetōga dena ayila.

Nawēnne so'olum dagi _____, la de la _____.

(Sapitri 4:20)

Tōma sān dōla Nawēnne, a wun bō tō pāŋa ti ti vōa la sira wu Azezi-Krisi n pa'ale ti se'em na.

Zāsum ya **sapitri 4:5** mina ē na zuugo.

⁵ Ti Zuudāana sān wa wa'am, a wun dūke sela n suge lika puam yese peelem puam, dee boti bōn-seba wuu ti nērhaalba tē'esri ba sūure puam puke. Wakat-ēŋa, Nawēnne wun pēge nēra woo wu lan mase ti a pēge ē se'em.

Sapitri 5

Karēņe-ya Korēnti gōņo sapitri 5.

Krisi nēra ka mase ti a uta yalsi.

La sãn dena Nawēnne gōņo puam, ba dıke la pɔg-dire ti la dena mãmsgo pa'alē Nawēnne la a nērba n nōņe taaba se'em. Bela la ka mase ti ti uta yalsi, dēnti ti buraaga la a pɔga vɔa la taaba la nōņlum, la stra, la pupeelum.

Nērba baseba sãn bɔna Nawēnne nērba puam tōnna tōon-be'ero dee ka teege yem base tōon-be'ero la, ti wun ēņe la wāne ?

(Karēņe-ya 5:2 lerge.)

La de la yalsi bēm buuri ti Korēnti nēra ēņe, dee ti ba sīna ?

(Karēņe-ya 5:1 lerge.)

La gulse Nawēnne gōņo puam yeti la ka mase ti nēra gā la a sɔ pɔga, bu a tã, bu nēra n de yo'olum na ě, bu a yire nēra (bıse ya Leviti dōma 18:6-18, la Lɔɔ gōņo 27:20-23).

Apoli n gulse yeti: <ya yese nēr-ēņa ya tēņasuka base Asūtāana nu'usum ti a sã'am a ĩyã, dee ti a sta wun yē fāagre ti Zuudāana Azezi wa'aņo daare > la, a vōore de la bēm ?

(Karēņe-ya sela n gulse gōņo la tilum lerge.)

Apoli dıke la bēm make pa'ale tuun-be'ego n ān se'em ?

(Karēņe-ya 5:6-7 lerge.)

Zoog-base kibsa de la Zīfu dōma kibsa ti ba diti yuune woo. Zīfu dōma ita ē tēera la bāma n daan de yamst bōna Ezipti la, lan daan ēņe se'em ti maleka la daan ku Ezipti dōma kom-dē'ensı dee zooge bāma base ka ku bāma la. Kibsa la wakate sān ēn paage, Zīfu dōma yire woo kuurt la pesgo dita kibsa la, tēera ti la de la pesgo zum ĩyā ti bāma yē fāagre. La kibsa la dia wakate, ba obrı la borborı n ka tarı dābulle. Ban daan kābli ti ba yese Ezipti la ĩyā n soe ti ba ka yāņe ze'ele ēņe dābulle ēņe mī.

Nawēnne gōņo puam dābulle māmstı la tōon-be'ero.

Pesgo la de la māmsgo n pa'alt ti Azezi n wa'am wa ki fāage tōon-be'ero dōma. Ba ku Azezi la Pakı kibsa wakate.

Krisi n daan sake ti ba ku ē tōma ĩyā la, la mase ti ti ita la bēm ?

(Karēņe-ya 5:7-8 lerge.)

La de la āndōma ti Apoli yeti, ti da lagım na ba ?

(Karēņe-ya 5:9-11 lerge.)

Bise ya tōon-be'ero la ti Apoli sōre la: Nēra sān nōḡe bōnɔ bu tura nērba, la de la tuun-be'ego wu a sān ita yalɩ bu zūura.

La dagi tōma n wun di seba n ka doli Nawēnne na sariya, Nawēnne n wun di ba sariya. La de la tōma bise tōma n de Nawēnne nērba la puam, da base ti nēra mina dee tōnna tuun-be'ero.

Tōma sān karēḡe gōḡɔ buyi dāana ti Apoli ḡulɩe bɔ Korēnti dōma la sapitri 2:5-11, ti wun bāḡe ti Korēnti dōma yuun sake Apoli n yelee'em na me sibge nēr-seka n tum tuun-be'ego la. La, la ēḡe wu yuune ayila poorum, Apoli le ḡulɩe me bɔ ba yeti, ba yāḡa base a tuun-be'ego la taale, dee bɔ ē buraane, pa'ale ē ba nōḡlum.

Zāsɩm ya **sapitri 5:8** mina ē na zuugo.

⁸ Base ya ti ti yese putē'e-be'ero, la tōon-be'ero wuu ti vɔm puam, dee dena pupeelem, la sira-dōma.

Sapitri 6

Karēḡe-ya Korēnti gōḡɔ **sapitri 6:1-11.**

Azezi nēra sān tara yelle la ayēma, la ka mase ti ba ēḡe la bēm ?

Ba mēḡa sān ka tā'age malge yelle la, la mase ti ba tarti sēḡe la āndōma zē'am?

Apoli yeti nēra sān ēḡe ti be'em, la mase ti ti ēḡe la bēm ?
(Karēḡe-ya 6:7 lerge.)

Apoli yeti āndōma n kǎn yē zē'a Nawēnne so'olum puam ?

(Karēņe-ya 6:9-10 lerge.)

1 _____	2 _____
3 _____	4 _____
5 _____	6 _____
7 _____	8 _____
9 _____	10 _____

Zāsūm ya sapitri 6:11 mina ē na zuugo.

**¹¹ Nawēnne Sia peege yāma tōon-be'ero mē boti ya lebge
Nawēnne nērba, mase a zē'am Zuudāana Azezi-krisi
yū'vɾē ĩyā.**

Karēņe-ya Korēnti gōņo sapitri 6:12-20 .

Dike ya ĩyā la nā'ase Nawēnne !

Karēņe-ya dee gulse sela n pɔ'oge pa'ase.

Yāma nērba baseba yeti: «Mam tarti sore wun ēņe _____

_____ mē.» La mam yeti ya ti dagi sela woo n tarti

_____. Mam mē tarti sore wun ēņe sela woo mē.

La mam kǎn sake lebge sela baa ayila _____.

(Sapitri 6:12)

Tuun- be'ego sǎn sōna tɔ, tōma de la tuun-be'ego la yamsi.

Apoli yeti bēm soe ti la ka mase ti ti ita yalsi ?

(Karēņe-ya 6:13 lerge.)

Apoli le yeti bēm soe ti la ka mase ti ti ita yalsi ?

(Karēņe-ya 6:15 lerge.)

Tōma ĩyā de la Nawēnne bēm ?

(Karēņe-ya 6:19 lerge.)

Nawēnne n da tōma la Azezi zum na, tōma mase ti ti ita la bēm ?

(Karēņe-ya 6:20 lerge.)

Apoli yeti: Tvun-be'e-seba wuu ti nērsaala iti la ka boe a ĩyā puam. La tvun-be'e-seka n de yalsi la boe la nērsaala ĩyā puam.

La sān dena bā'a-seka ti ba wi'iri ti SIDA bu eesti, nōore zozo'e la de la yalsi ĩyā ti a yōkri nēra. Bela tōma sān sake Nawēnne yetoga, la wun sōņe ti me ti ti tara ĩmā'asum. Ti Zuudāana n soe ti ĩyā la, a ka boori ti ti sā'am ē la yalsi Tōoma.

Sapitri 7

Karēņe-ya Korēnti gōņo sapitri 7.

Pog-dire yelle

Apoli lerge la sokrisi ti ba soke ē. Tōma ka bāņe ban soke ē se'em, tōma mi la ēn lerge se'em mā'a.

Korēnti nērba baseba daan tē'esri me ti nēra sān ka di poga n sōi. Apoli sake me ti nēra sān tāna wun yōke a mēņa ka di poga bu ka ele, la ān sōņa (7:7-8). La Korēnti tēņa la puam nērba zozo'e n boe mī ita yalsi. Bela ti Apoli yeti, lan wun ēņe se'em ti ba da ēņe yalsi, buraaga woo di a poga, ti pōka woo mē ele a stra.

Bēm soe ti buraaga mase ti a bo a poga lan mase ti a bo ē sela, ti poka mē bo a sira lan mase ti a bo ē sela la ?

(Karēņe-ya 7:3-4 lerge.)

Nēra sān sēņe sore ka yuura dee base a poga, la mase bu la ka mase ?

(Karēņe-ya 7:5 lerge.)

Zuudāana Azezi nōore la de la bēm ti Apoli yeti la de la pēgre ?

(Karēņe-ya 7:10-11 lerge.)

Nēra sān sake Azezi, la ka de a di poka bu a ele sira n dagi Azezi nēra (le karēņe 7:39). La nēra sān pōn tara poga bu sira dee sake Azezi, a wun ēņe la bēm ? (Karēņe-ya 7:12, 13, 15 lerge.)

Korēnti dōma daan tē'esri ti nēra sãn tara pɔga bu sira n dagi Azezi nēra, a wun dēge ē me, bela ĩyã ti ba tē'esra ti dase'ere la wun dena pēgre ti ba base ē.

Apoli ka sake bela, a yeti bēm ? (Karēņe-ya 7:14 lerge.)

Bēm soe ti Apoli yeti, <seka n ka doli Azezi sore la, sãn boora ti a base seka n doli Azezi sore la, a base ē ti a fōrge > ?

(Karēņe-ya 7:15 lerge.)

Apoli n yeti: <Sela n ãn sōņa de la nēra woo vɔa wu ěn daan ãn se'em ti Nawēnne wi ē na, wu Zuudãana n bo ē ti a vɔa se'em na > la boori ti la yeti ban dōge tōma zē'e-seka bu tōma yirdōma n ãn se'em, tōma sãn dena bōntatba bu nasadōma, bu tōma n de buur-seka nērba, ti sãn tara sira bu pɔga bu ti sãn ka tara, ěna dagi yelle, sela n ãn sōņa de la ti sake Nawēnne nōore. (Sapitri 7:17-19)

Karēņe-ya dee gulse sela n pɔ'oge pa'ase.

Nawēnne da ya la toogo, bela _____

(Sapitri 7:23)

Apoli tōge seba n ka tari sirba, bu pɔgba la yelle yeti bo ?

(Karēņe-ya 7:25-26 lerge.)

Apoli n tē'ese yeti nēra sān bōna ayila n sōi la, a boori ti a yeti nēra sān di pōga bu ele sira, la ka ān sōŋa bu ?

(Karēŋe-ya 7:28 la 7:38 lerge.)

Bēm soe ti Apoli yeti, seba n ka tari sirba, bu pōga bōna bayila wu ban ān se'em na ? (Karēŋe-ya 7:28 lerge.)

Wakat-seka ti Nawēnne bō to la n ka le zo'oge la ŋyā, la mase ti ti uta la bēm ? (Karēŋe-ya 7:29-31 lerge.)

Nēra sān ka di pōga bu ka ele sira, a yōore de la bēm ?

(Karēŋe-ya 7:32-34 lerge.)

Apoli boori ti tōma wuu ita la bēm ?

(Karēŋe-ya 7:35 lerge.)

Nēra pōga bu a sira sān ki, a tari sore won ēṅe la bēm ?

(Karēṅe-ya 7:39 lerge.)

A sān ka le ele, sū-yēlga ka le bōna mē bu ?

(Karēṅe-ya 7:40 lerge.)

Nēra sān tara pōga bu sira, bu a sān ka di pōga bu ka ele sira, a tā won vōa wu Nawēnne n boori se'em me tara sū-yēlga. Sela n de pēgre bō ba wuu de la ba sake Nawēnne vōa wu lan mase dee da ita yalsi.

Sapitri 8

Karēṅe-ya Korēnti gōṅṅo sapitri 8.

Apoli ken lerge Korēnti dōma la sokrisi.

Ba de la baga nēnno yelle.

Apoli zēbri la nēr-seba n yeti bāma soe ba mēṅa, dee tara bāṅre la, ti ban iti se'em na pa'ali mē ti nōṅlum ka boe ba zē'am.

Karēṅe-ya dee gulse sela n pō'oge pa'ase.

Ti mi ti baga de la sela n de _____ dūnia wā zuo, dee ken mina ti _____ mā'a n boe.

A de la ti _____ n nāam _____, la ēṅa iṅyā ti ti _____.

La tōma ken mina ti _____ mā'a n boe, a de la Azezi-krisi, la doose la ēṅa _____, la ken doose la ēṅa ti ti tara _____. (Sapitri 8:4-6)

Bāma n bāņe sela la ān sōņa me. La ban dīke ba bāņre la ita sela la ka ān sōņa.

Nēra sān tara bāņre dee ka tara _____, bāņre la boti a zēkra la a mēņa.

(Sapitri 8:1)

Nēra sān tē'esra ti a tara bāņre, a ken ka mina sela n mase.

Bāņre sira sira de la Nawēnne mi tōma me boti ti lagum na ē tara nōņlum. **(Sapitri 8:2)**

Ba bāņre la boti ba dita la бага nēnno boti nērba baseba tuura. Dēnti ti ba tara nōņlum dīke ba bāņre la ita sela n wun sōņe nērba ti ba ze'ele kāņkāņe Nawēnne sore doosgo puam.

La dagi _____ n wun boti ti lem Nawēnne. Ti sān ka di, sela ka _____ to, la ti sān di, a ka _____ ti sela.

(Sapitri 8:8)

Dēnti ti ti guuse ti mēņa, ti ti da ēņe sela n wun base ti nēr-seba n ka tarti pāņa Nawēnne sore doosgo puam na

(Sapitri 8:9)

Tōma sān mina ti sela ti ti tara nōore wun ēņe la tā wun base ti ti sōbia tum tvun-be'ero, la mase me ti ti da ēņe bela base ti ti sōbia tum tvun-be'ero.

(Sapitri 8:13)

Sapitri 9

Karēņe-ya Korēnti gōņo **sapitri 9.**

Apoli base ēn tarti sore wun ēņe sela la me

Apoli dike la a mēņa make pa'ale tōma ti la dagi pēgre ti ti ēņe sela woo ti ti tarti nōore wun ēņe. Tōma n de Nawēnne nērba la, tōma mēņa tā wun looge yem me base sela urgō Nawēnne so'olum na ĩyā.

Bēm ti Apoli tarti sore wun ēņe dee ka ita ?

(Karēņe-ya 9:4-5 lerge.)

Zē'e-seba ti ti karēņe wā, la de la nērba baseba n yeti Apoli n ka to'ori sōņre Nawēnne nērba zē'am na, a dagi Nawēnne tōntōnna. Bela ti a pa'ale ba ti ēņa de la tōntōnna, la ēņa tarti sore me ti a to'oge sōņre Nawēnne nērba la zē'am. La, la de la ēņa mēņa n looge a yem tōnna dita dee ka boora sōņre.

Bēm ti Apoli dike nērba vom pvam make pa'ale ti seka n mōole kō-yēlga la tarti sore me ti a to'oge sōņre a tvune ĩyā.

(Karēņe-ya 9:7 lerge.)

1

2

3

Bēm ti a le dike make pa'ase a yetoga la pāņa ?

(Karēņe-ya 9:8, 13, 14 lerge.)

1

2

Bēm soe ti Apoli tara nōore wun to'oge sōjre Nawēnne nērba la zē'am, dee ka bōra sōjre ? (Karēje-ya 9:12 lerge.)

Apoli n gulse la, a boori ti ba bō ē na sela ti a taru nōore ti a to'oge la bu ? A yeti bo ? (Karēje-ya 9:15 lerge.)

Bēm ti Apoli yeti la dagi ēja mēja n looge yem mōola kō-yēlga la, la de la pēgre ti ēja mōole ? (Karēje-ya 9:17 lerge.)

Apoli yeti ēja yōro de la bēm ? (Karēje-ya 9:18 lerge.)

Apoli iti la ēja n wun ēje se'em ti kō-yēlga la mōolgo sēje nēja.

Karēje-ya dee gulse sela n pō'oge pa'ase.

Mam soe m mēja me, mam dagi nēra _____.

La baa bela, mam dīke m mēja lebge la _____

_____, ti m tā'age boti ba nērba zozo'e _____

_____. (Sapitri 9:19)

Mam sãn bõna la nēr-seba n ka tari pãña Nawēnne sore doosgo pvam, mam vɔa wu bāma, ti _____
_____. Mam iti sela woo la bela bɔ'ɔra nērba buuri wuu, ita mam wun ēñe se'em ti m tã'age _____ ba nērba baseba. (Sapitri 9:22)

Apoli le pa'ale la sela n soe ti ēña ita bela wuu.
A yeti bo ? (Karēñe-ya 9:23 lerge.)

Apoli pa'ale me ti ēña yɔɔɔɔ dagi bõn-seba ti ēña wun to'oge nērba zē'am na, ēña yɔɔɔɔ de la Nawēnne bɔ'a.

Apoli dıke la bēm makra Nawēnne nērba vɔm n ãn se'em ?
(Karēñe-ya 9:24-26 lerge.)

Mõrge ya wu zɔtba n zoti se'em na, ti ya yãñe _____
_____. (Sapitri 9:24)

La sãn dena zɔa, nēra ayıla mã'a n diti. La sãn dena Nawēnne nērba zē'am, la dagi nēra ayıla mã'a n diti. La dēni ti ti mõrge la ti pãña wuu yãñe paage ba'asgo.

Zɔtba wuu yõkri ba mēña me sela woo pvam ti ba to'oge bɔ'a n kãn yuuge dee sã'am. La tōma yõkri ti mēña ti ti wa to'oge la _____ . (Sapitri 9:25)

Grēki dōma yuun dīke la tusti vōoro ēņe tara bō'ora seba n zoti la pa'ala ti ba zoe yāņe mē. Bō'a la vōore yuun de la nā'asgo mā'a, la a ka yuuri dee sã'ana.

Bēm ti Apoli yeti ēņa ka boori ti a koņe ?

(Karēņe-ya 9:27 lerge.)

Sapitru 10

Israyelt dōma māmso

Apoli dīke la Israyelt dōma yelle make pa'ale tōma ti wun ēņe se'em.

Israyelt dōma yuun boe la Ezipti dena yamsi, ti Ezipti naba nāmsra ba zozo'e. Ti Nawēne boti Amoyisi sēņe ka tart ba yese. Ban yuun yese la, ba boe la weem, ti Nawēne bōna ba nēņa sawate puam tart ba we'esa Kanaan tēja. Ti Ezipti naba yuun yeti ēņa ka le tara yamsi, isge babsra ba ti a tara ba lebe.

La Israyelt dōma yuun paage la ko'o-kāte nōorum ka tāna wun tole. Bilam ti ba gelge bise poorum yē Ezipti naba, la a nērba n sēm la ba zebre lōgro. Ti dabeem yōke ba zozo'e ti ba kaasra. Ti Nawēne boti Amoyisi dīke dasaare tēge ti ko'o-kāte la welge zē'esti bayi dee ti tēja la lebge ke'ēja, ti Israyelt dōma doose tole.

Ti Ezipti naba, la a nērba la paage ko'o-kāte la nōorum sige mē dōla ti ba tole, ti Nawēne boti Amoyisi le tēge dasaare la, ti ko'om na lebe libe ba wuu ku ba.

Bela poorum Israyelt dōma yuun boe la weego la puam ti dia ka bōna ti ba wun di. Ti Nawēne boti dia yu'ure n de Manne ze'ele saazuum sigra daare woo ti ba dita.

La ba yuun paage la zē'a ayēma ti ko'om ka bōna wun yū, ti Nawēnne boti Amoyisi wē tānpia ti ko'om yese ti ba yū.

La Nawēnne yuun wi Amoyisi la tāṅa zuo ti a tōge la ē. Wakat-seka ti Amoyisi boe tāṅa la zuo yuura la, lsrayelt dōma la yele me yeti: <Amoyisi ka le bōna>, maale bagre ze'ele, ēṅe de'eṅ-kāte ita ban boort se'em, kāabe ē yeti ēṅa n de bāma wēnne.

La ba yuun sēṅe weego la puam ka paage la tēṅa yu'ure n de Moabi ēṅe yalst la tēṅa la pugunto, ti Nawēnne boti ba nērba tuspisyi la atā ki.

La ba yuun yōnni Amoyisi me ti dia la ka ān sōṅa, ti la ka ēṅe Nawēnne sūure yēlum, ti a boti bōnse'edōma ku ba nērba zozo'e.

La ba yuun ken yōnna me ti bāma ka sake ti Amoyisi la A'arō sōna bāma, ti Nawēnne boti ba nērba zozo'e ki.

Bela ti Apoli makra pa'ala to ti ti da ēṅe wu bāma la.

Karēṅe-ya Korēnti gōṅo **sapitru 10:1-13.**

Tōma sān mise ko'om la Azezi yu'ure, la pa'ale ti ti de la ayila la Azezi, la mē pa'ale ti ti looge yem ti ti wun doli Azezi wakate wuu. Bela ti Apoli yeti nērba la n yuun doose Amoyisi sawate la tēṅa, la ban doose ko'o-kāte la puam tole la, la ān wu ko'om misga n boti ba dena ayila la Amoyisi. **(Sapitru 10:1-2)**

Nawēnne n yuun bō lsrayeldōma dia n ze'ele saazuum, la ko'om n yese tānpia puam na, la de la māmsgō n pa'ale ti Azezi bō tōma sela woo me.

Azā gōṅo la puam Azezi yeti ēṅa n de dia n bō'ort vōm n ka ba'asri, la seka n bō ēṅa sira, koyūuro kān tari ē. **(Azā 6:35)**

Apoli pa'ale ti Nawēnne yuun ēṅe lsrayelt dōma yel-sōnne zozo'e me, la baa bela, ba nērba zozo'e yuun ka iti sela n mase Nawēnne yem, ti a yuun sibge ba.

Nawēnne yuun ēṅe la bēm bɔ Israyeli dōma ?

(Karēṅe-ya 10:1-4 lerge.)

Israyeli dōma yuun tum na tuun-be'e-bāna ti Apoli yeti ti da
ēṅe wu bāma n ēṅe se'em na ? (Karēṅe-ya 10:7-10 lerge.)

Karēṅe-ya dee gulse sela n pɔ'oge pa'ase.

Bōn-bāma wuu yuun ēṅe ti yaabdōma ti la dena la māmsgo
bɔ nērba baseba. La ba gulse bela, ti la dena la _____
bɔ tōma seba n boe wakat-ēna ti dūnia lem
_____. (Sapitri 10:11)

Nēr-seka n tē'ese ti ēṅa iti sōṅa dee ze sōṅa, mase ti a iti la
bēm? (Karēṅe-ya 10:12 lerge.)

Nāmsgo sān paage tɔ, la de la ti wībe, ze'ele kāṅkāṅe
Nawēnne doosgo puam. (Azaki 1:3)

Āne n wun bɔ tɔ pãŋa ti ti yãŋe wĩbe ? (Karẽŋe-ya 10:13 lerge.)

Zãsum ya sapitri 10:13 mina ẽ na zuugo.

**¹³ Nawẽnne de la sra dãana,
a kãn base ti makre seka n gãnni ya pãŋa paage ya.
La makre puam, a wun bɔ ya pãŋa ti ya wĩbe,
dee ẽŋe sore ti ya yese.**

Karẽŋe-ya Korẽnti gõŋɔ sapitri 10:14-22.

Baga dia, la Zuudãana kũm tẽere dia yelle

Tun diti Zuudãana kũm tẽere dia, dee yũura bõn-yũula la, la pa'alt la bẽm ? (Karẽŋe-ya 10:16 lerge.)

Bẽm ãyã ti Apolt yeti ti yese ti mẽŋa baga kãabgɔ puam ?
(Karẽŋe-ya 10:20 lerge.)

Karẽŋe-ya Korẽnti gõŋɔ sapitri 10:23-11:1.

Nã'asra ya Nawẽnne yãma n uti sela woo puam

Bēm īyā ti Apolī yeti, ti da ēņe sela woo ti ti tarti sore wun ēņe la ? (Karēņe-ya 10:23 lerge.)

Zāsum ya sapitri 10:24 mina ē na zuugo.

**²⁴ Nēra nēra da eera a mēņa sōņre mā'a,
eera ya taaba sōņre.**

Ti sān ka bāņe nēnno n ze'ele zē'a, ti sān obe, la ka tā wun ēņe ti sela sela. La nēra sān yeles ti yeti nēnno na de la бага nēnno dee ti ti obe, la de la nēra la tē'esgo īyā ti la ka āna sōņa ti ti obe. Tōma sān obe, la tā wun gu a Nawēnne sore doosgo me.

Bela ti Apolī yeti: **Da ēņe ya sela nērba zē'am ti la gu ba Nawēnne sore doosgo.** (Sapitri 10:32)

Apolī yeti ti sān ita sela woo, ti ita wāne ? (Karēņe-ya 10:31 lerge.)

Apolī yeti, ti ita wu ēņa n iti se'em na. Ti sān dola Nawēnne, dēnti ti tōma vom āna sōņa pa'ale nērba Nawēnne doosgo n ān se'em.

Karēņe-ya dee gulse sela n po'oge pa'ase.

Ita ya wu _____ n iti se'em na. Mam mōrgri me ti m ēņe sela n ān nēra woo sūure yēlum _____ puam, mam ka eeri _____, mam eeri la nērba zozo'e sōņre, ti ba tā'age _____.

(Sapitri 10:33)

Sapitri 11

Karēņe-ya Korēnti gōņo **sapitri 11:2-16.**

Sapitri ēna pvam, Apoli lerge Korēnti dōma la sokrsti ti ba soke ē. Bela ti a yele sapitri la ba'asgo ti yel-seba n weege la, ēņa sān wa wa'am, ēņa wun maale.

Buraaga la pōka n wun āna se'em Wēndeto pvam

Kalam ti yē ti Apoli daan sake me ti la mase ti pōgsti pu'use Nawēnne dee to'oge Nawēnne yetōga tōge bō nērba **(Sapitri 11:5).**

A yele Korēnti dōma ti la mase me ti pōgsti vugra ba zuto. Korēnti, la daan mase me ti pōka woo vugra a zuugo. La daan de la pōg-seba n iti yalsi mā'a n ka vugri ba zuto.

Apoli ka boorti ti Nawēnne nērba ita sela n de yānne nērba zē'am.

Bela ti a gulse yeti: Ti mi ti la de la yānne bō pōka ti a pōn a zuugo, bu a se a zomto. Bela, dēnti ti a vuge a zuugo.

Dee le yeti: Nērba wuu mi me ti buraaga sān base a zomto ti ba wōge, la de la yānne. La pōka sān base a zomto ti ba wōge, la de la pēka bō ē. **(Sapitri 11:6,14-15)**

Dūnia zuo zē'esti zozo'e buraasti pēgrti pōgsti yela zozo'e pvam me. Wakat-seka ti Adam la Awa yuun tum tuun-be'ego la, Nawēnne yeti, tuun-be'ego la iŷā, nērba wuu wun ki me, dee yeti buraasti wun sōna pōgsti. Ēna de la subgre nērba tōon-be'ero la iŷā. La Azezi n yāņa wa'am wa fāage tōma tōon-be'ero pvam base.

Bela ti Apoli yeti:

(Karēņe-ya dee gulse sela n pō'oge pa'ase.)

La Zuudāana doosgo la pvam, pōka boe la buraaga nu'usum, ti buraaga_____.

Nawēnne daan dīke la buraaga nāam pōka. Ti pōgsti mē

_____ . Bela wuu ze'ele la

_____ . **(Sapitri 11:11-12)**

Karēņe-ya Korēnti gōņo sapitri 11:17-34.

Zuudāana kŭm tēere dia

Apolt daan wōm ti Korēnti dōma sān ēn lagse taaba ti ba pu'use Nawēnne, welgre n boe ba tēņasvka. Ba sān ēn lagse ti ba di Zuudāana kŭm tēere dia, nēra woo diti la a mēņa dia. Tī seba kōm dōnna, dee ti baseba yū buge.

Apolt ka yeti la ka mase ti Nawēnne nērba lagse put ba dia di. A yeti, nēra woo sān dita a mēņa dia dee ka puta la taaba, nēra woo yi di a yire.

Bela ti Apolt yele yeti, bān uti se'em na ka mase. Ban uti se'em na, ba uti la nāsdōma yānne dee ka nānna Nawēnne nērba. (Sapitri 11:22)

Borbort ti Azezi daan dīke bō a karēnbiisi la māmstrī la bēm ?
(Karēņe-ya 11:24 lerge.)

Bōn-yūula ti Azezi daan dīke bō a karēnbiisi la pa'alt la bēm ?
(Karēņe-ya 11:25 lerge.)

Azezi n daan yeti ti fiise borbort obe dee yū bōn-yūula la, a yeti ti uta bela ti la dena la bēm ? (Karēņe-ya 11:24-25 lerge.)

Tōma sãn di Zuudãana kũm tẽere dia, ti pa'alt la bẽm ?

(Karẽŋe-ya 11:26 lerge.)

Tōma sãn di Zuudãana kũm tẽere dia, ti pa'alt la Zuudãana kũm yelle. La boort ti la yeti, Azezi kũm na ãyã Nawẽnne base ti tũon-be'ero taale me, la ken pa'ala ti Azezi de la ti Zuudãana, ti sakra a nõore.

1 Azã 1:9 yeti: Ti sãn pelge ti puure tũge ti tuun-be'ero, Nawẽnne wun base ti tũon-be'ero taale me.

Bela, nõra sãn ka sake ti Azezi de la a Zuudãana, bu a sãn ka sakra a nõore, bu a sãn tum na tuun-be'ego dee ka sose sugri, ãŋa dãana ka mase ti a obe dee yũ.

Nẽr-seka n ka mase sãn di, bẽm iti ? (Karẽŋe-ya 11:29 lerge.)

Tōma sãn iti sela n ka mase, ti Zuudãana sibgra tũ, la de la bẽm ãyã ?

(Karẽŋe-ya 11:32 lerge.)

Sapitru 12

Karēņe-ya Korēnti gōņo **sapitru 12:1-12.**

Nawēnne Sia bō'a yelle

Nēra sān ka tara Nawēnne Sia bō'a, a ka tā wun tum Nawēnne Tōoma, bela ti Apolt yeti: <Mam boort ti ya bāņe la bōn-ēņa yelle sōņa > .

Nawēnne Sia boe la a nērba wuu, Nawēnne Sia sān ka bōna la nēra, ēņa dāana dagt Nawēnne nēra.

Nawēnne Sia sān bōna la nēra le, ēņa dāana ka tā wun yeti bēm, bu a wun yeti bēm ? **(Karēņe-ya 12:3 lerge.)**

Bēm īyā ti Nawēnne Sia la bō'ora nēra woo bō'a ?
(Karēņe-ya 12:7 lerge.)

Nērba wuu bō'a la de bōn-yēnne me bu ?
(Karēņe-ya 12:4 lerge.)

Nawēnne Tōoma de la buuri ayīla bu? **(Karēņe-ya 12:5-6 lerge.)**

Nawēnne Sia ayɩla n bɔ'ɔri bɔ'a la wuu. Sɔre ya bɔ'a to'oto'ore la n de sɛla. (Karēŋe-ya 12:8-10 lerge.)

1 _____
2 _____
3 _____
4 _____
5 _____
6 _____
7 _____
8 _____
9 _____

Karēŋe-ya dee gulɛ sɛla n pɔ'ɔge pa'asɛ.

La de la Nawēnne Sia n itti belɛ wuu. A bɔ'ɔri nēra woo la bɔ'a to'oto'ore wu _____.

(Sapitri 12:11)

Karēŋe-ya Korēnti gōŋɔ sapitri 12:12-31.

Apoli dɩke la bēm make Azezi nēba n ān se'em?

(Karēŋe-ya 12:12 lerge.)

Bēm boti nēba buuri wuu lebge ŷyā ayɩla ? (Karēŋe-ya 12:13 lerge.)

Sapitri 12:15 ka paage 17 la, nã'are, la tubre, la nifo mãmsri la bẽm ?

Ïyã zẽ'estu to'oto'ore n boe, la ba de la ïyã ayila. Bela, la de la Nawẽnne n boori ti a nẽrba dena to'oto'ore dee sõgra taaba dena ayila. La mase ti Nawẽnne nẽra yeti, ãña kãn lagum na Nawẽnne nẽrba baseba me bu? (Karẽnge-ya 12:15-16 lerge.)

Nawẽnne nẽra woo sãn ãna wu a tadãana n ãn se'em na, la tarti sõgre me bu ? (Karẽnge-ya 12:17 lerge.)

Nawẽnne nẽra tã wun yele ayẽma yeti, ãña ka boori a sõgre me bu ? (Karẽnge-ya 12:21 lerge.)

Nẽr-seba n ãn wu ba ka tarti pãña la, ba ka tarti yõoro me bu ? (Karẽnge-ya 12:22 lerge.)

Seba ti tõma bise ti ba ka tarti yõoro zo'oge la, ti mase ti ti ita la bẽm ? (Karẽnge-ya 12:23 lerge.)

Nēra ayiła sãn nãmsra, bu nēra ayiła sãn yē nã'asgɔ, Nawēnne nērba wuu itti la bēm (Karēŋe-ya 12:26 lerge.)

Tōma n de Nawēnne nērba n de Krisi iŋyã la, la mase tti sōŋe nērba buuri wuu wu Krisi n daan vɔa dũnia zuo sōŋra nērba se'em na.

Nawēnne ēŋe nēra woo la a zē'am a nēr-kuvɔŋ la puam. La dagi tti mēŋa n looge tōma n boori tvun-seka, la dēni tti karēŋra Nawēnne yetɔga tti wun bāŋe Nawēnne n boori sela, dee wōm ēŋa n pa'ale tɔ tti wun ita se'em paage a yem.

Apoli yeti: <Eera ya bɔ'a seba n gãnni wuu>, dee pa'ale sore seka n gãnni sela woo: la de la nōŋlum (Sapitri 13).

Sapitri 13

Karēŋe-ya Korēnti gōŋɔ sapitri 13.

Nōŋlum yelle

Karēŋe-ya dee gulse sela n pɔ'ɔge pa'ase.

Mam sãn tɔgra nērsaalba buuri wuu yetɔga, dee tara Nawēnne bɔ'a buuri wuu, dee ka tara **nōŋlum**, mam de la _____. Sela woo tti mam itti la, mam sãn ka tara **nōŋlum**, bela ka tarti _____ bɔ mam. (Sapitri 13:1-3)

Nēr-seka n tarti nōḡlum iti la bēm dee ka iti bēm ?

(Karēḡe-ya 13:5-7 lerge.)

1 _____

2 _____

3 _____

4 _____

5 _____

6 _____

7 _____

8 _____

9 _____

10 _____

11 _____

12 _____

13 _____

14 _____

15 _____

Wakate sān wa paage ti Nawēnne malge sela woo ti la mase sōḡa sōḡa, sela fēe ti tōma mi la won tole. Bēm ka malun ba'asra ?

(Karēḡe-ya 13:8-10 lerge.)

Karēḡe-ya dee gulse sela n pɔ'oge pa'ase.

Tōma n mi sela leelee wā, ān wu _____
_____. La wakat-ēḡa ti won yē
_____. (Sapitru 13:12)

Zāsum ya **sapitru 13:13** mina ē na zuugo.

13 Bõn-bāna batã n boe wakate wuu: La de la bõ sira, la tu tara putē'ere gu'ura sela tu tu bõ sira la, la nõļlum. La bõn-bāna batã pvam, nõļlum n gãnnu ba wuu.

Sapitru 14

Karēņe-ya Korēnti gõņo sapitru **14:1-25.**

Tu wun ēņe se'em tu Nawēnne Sia bõ'a la sõņe nērba

Seka n to'osru Nawēnne yetõga tõgra bõ'õra nērba, sõņe la nērba la wāne ? (**Karēņe-ya 14:3 lerge.**)

Nēra sãn tõge yetõg-zãņst tu nēra ka bõna wun to'oge yetõga la tõge a võore pa'ale nērba la, bu nēra sãn to'osru Nawēnne yetõga tõgra bõ'õra nērba la, bēm n tarti võore gãnna ? (**Karēņe-ya 14:5 lerge.**)

Tõma n mõrgē eera Nawēnne Sia bõ'a la, tu eera ya bõ'a bāna? (**Karēņe-ya 14:12 lerge.**)

Bēm puam ti la mase ti ti āna wu kōma n ān se'em na ?
(Karēņe-ya 14:20 lerge.)

Bēm puam ti la ka mase ti ti āna wu kōma la ?
(Karēņe-ya 14:20 lerge.)

Karēņe-ya Korēnti gōņo sapitri 14:26-40.

Uta ya sela woo ti ba dola sore

Nawēnne nērba sān lagsra taaba ti ba pu'usra Nawēnne, la mase ti ba nēra ayila wun ēņe sela woo bu nērba to'oto're wun sōņe taaba ?
Ba wun ēņe la wāne ? (Karēņe-ya 14:26 lerge.)

Ban ita bela wuu la, la yeti la sōņe Nawēnne nērba ti ba ēņe la bēm ?
(Karēņe-ya 14:26 la 14:31 lerge.)

Nawēnne boort la bēm, a ka boort bēm ? (Karēņe-ya 14:33 lerge.)

Kurum kurum pōgst ka tarti nōore. Azezi n yuun tōgrt la Samaritē pōka la, la di'ige a karēnbiisi la me ēn tōgrt la pōka la (Karēņe-ya Azā 4:27).

Galati gōņo puam Apoli yeti: <Yāma n lagum na Krisi la, bokre ka le bōna ti fu de la pōka bu buraaga, ya wuu de la ayıla > (Galati 3:28). Azezi nērba zē'am pōgst tarti nōore me gānna dūnia nērba zē'am. Ba pu'usrū la Nawēnne dee t'ōsra Nawēnne yetōga bō'ōra nērba (bise ya sapitri 11:5). Aprišili daan lagum na a sira tōgra Nawēnne yetōga (Tōoma gōņo 18:26).

Tā ti la de la bela iŷā ti pōgst baseba uke ba mēnsi Nawēnne nērba lagsō zē'am ka le selsra dee sōsra la taaba. Lan gulse sapitri 14:34 <sore ka boe ti ba dare tōgra Nawēnne nērba lagsō zē'am > la, a vōore mē tā dena <sore ka boe ti ba sōsra la taaba Nawēnne nērba lagsō zē'am >. Sela n pa'ase, buraasi zozo'e daan zāsum karēņre me dee ti pōgst ka sēņe karēndeem, bela iŷā ti Apoli yeti, ba da sōgsra nērba wuu karēņre zē'am, ba sōkra ba sirba ba yie.

Sapitri la ba'asō Apoli yeti, <m sōbiisi, mōrge ya t'ōsra Nawēnne yetōga tōgra bō'ōra nērba, dee da gu ya nērba ti ba da tōge yetōg-zāņsi.

La ita ya sela woo ti _____
dee _____. (Sapitri 14:39-40)

Sapitru 15

Karēņe-ya Korēnti gōņo sapitru 15:1-11.

Krisi kūm vo'ore yelle

Ti sān gure Nawēnne kō-yēlga la kāņkāņe ti wun yē la bēm ?

(Karēņe-ya 15:2 lerge.)

Bēm ēņe wu lan gulse Nawēnne gōņo puam se'em na ?

(Karēņe-ya 15:3-4 lerge.)

La de la bēm ģyā ti Krisi ki ? (Karēņe-ya 15:3 lerge.)

Krisi n ki la, bēm tu ba ēņe ? (Karēņe-ya 15:4 lerge.)

Ban laage ē na pa'ale ti **a suri ki mē.**

Krisi n vo'oge la, bēm tu a ēņe ? (Karēņe-ya 15:5-7 lerge.)

Nērba zozo'e n yē ē a vo'ore poorum pa'ale ti **a suri vo'oge mē.**

Apoli ẽnge la wãne sike a mẽɲa dee wẽ'era yõ'ogo bẽm ãyã ?
(Karẽnge-ya 15:8-10 lerge.)

Le karẽne ya Sapitri 1:29, 31. Apoli suti ẽnge me wu ẽn pa'ale nẽrba ti
ba ẽnge se'em na bu ?

Karẽnge-ya Korẽnti gõɲo sapitri 15:12-34.

Kũm wuu vo'ore yelle

Tõma n tarti putẽ'ere la Kriisi la, dena la tõma n voa dũnia wã zuo mã'a
ãyã ? (Karẽnge-ya 15:12-19 lerge.)

Kriisi n ki dee vo'oge la, pa'ale la bẽm ? (Karẽnge-ya 15:20 lerge.)

La de la ãne ãyã ti nẽrba kiira ? (Karẽnge-ya 15:21-22 lerge.)

La de la ãne ãyã ti kũm wun vo'oge ? (Karẽnge-ya 15:21-22 lerge.)

Krisi n wun sã'am a be'eba wuu la, la de la ãndõma ?
(Karẽnge-ya 15:24-26 lerge.)

Kũm n de be-seka ti a wun wa sã'am poorum. Azezi n yãŋe kũm na, kũm ka le tara pãŋa la tõma, baa ti sãn ki, ti wun vo'oge. Bela ãyã la tarti võore me ti ti põsra ti yõore Nawẽnne so'olum na ãyã.

La sãn dena la dũnia zuo vom mã'a ãyã, Apoli n yẽ nãmsgo la tarti yõoro me bu ? Bela, a wun yele ni ti bẽm? (Karẽnge-ya 15:32 lerge.)

La de la kũm n wun vo'oge la ãyã, ti ti kãn yele bela. Bẽm ti Apoli yele ti da ita ? (Karẽnge-ya 15:33-34 lerge.)

- 1 _____
- 2 _____
- 3 _____
- 4 _____

Karẽnge-ya Korẽnti gõŋo sapitri 15:35-58.

Seba n wun vo'oge la ãyã n wun ãna se'em

Karẽnge-ya dee gulse sela n po'oge pa'ase.

Nẽra sãn ki ti ba laage ã, a ãyã põ'ortu me. La Nawẽnne sãn wa vo'oge ã, _____.

Ba sãn laage kũm, a lɔre me dee dena gille. La a sãn vo'oge,
_____, dee _____.

Ban laage ẽ na, a tarti la dũnia zuo ãyã. La Nawẽnne sãn wa
vo'oge ẽ, a tarti la ãyã _____.

(Sapitru 15:42-44)

Dũnia nẽrba wuu ãn wu nẽr-seka ti Nawẽnne daan dıke tẽña
tẽntõnnɔ nãam na. Ti Nawẽnne yire nẽrba mẽ ãna wu nẽr-
seka _____ (Sapitru 15:48-49).

Nẽr-ẽña de la ãne ? _____ .

Tõma nẽrsaalba seba n kãn ki dee ti dũnia ba'ase la, bẽm wun ẽñe to ?
(Karẽñe-ya 15:51-53 lerge.)

Zuudãana Azezi-krisi ãyã, Nawẽnne bo tõma pãña ti ti yãñe la bẽm ?
(Karẽñe-ya 15:57 lerge.)

Zãsum ya sapitru 15:58 mina ẽ na zuugo.

**⁵⁸ Bela, m sɔbi-nõgrıstı, mõrge ya ze'ele kãñkãñe.
Tõnna ya Zuudãana Tõoma la wakate wuu da base,
yãma n mi ti nãmsg-seka ti ya nãmsrı Zuudãana la ãyã
dagi zãña la.**

Sapitru 16



Karēņe-ya Korēnti gōņo sapitru 16.

La ān sōņa me ti ti lagsru ligri ti ti sōņra Nawēnne nērba. La, la de la pērgre ti Nawēnne tuntōntba bise ligri la yelle sōņa ti yelle da bona. Bela Apoli yeti ēņa mēņa wun ēņe la bēm la bēm ?

(Karēņe-ya 16:3-4 lerge.)

Ba'asgō la, Apoli kā'an Nawēnne nērba ti ba ita la bēm ?

(Karēņe-ya 16:13-14 lerge.)

Maranata boort ti la yeti bēm ? (Karēņe-ya 16:22 gōņ-vōogō la tilum lerge.)
